



6  
17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44

全  
卷  
二十四卷



16  
吉140  
564.3  
部-3





金石錄卷之十七

跋尾七

漢梁相費汎碑

漢堂邑令費君碑

漢費君碑陰

漢太尉陳球碑

漢華嶽碑

漢太尉郭禧碑

漢郭禧碑陰

漢郭禧後碑



結一廬朱氏贍餘叢書



漢樊毅西嶽碑

漢禹廟碑

漢冀州從事郭君碑

漢逢童碑

漢逢童碑陰

漢三公碑

漢殺阬君神祠碑

漢殺阬君神祠碑陰

漢無極山碑

漢揚州刺史敬使君碑

漢藁長蔡湛頌

漢蔡湛碑陰

漢安平相孫根碑

漢涼州刺史魏君碑

漢碭孔君神祠碑

漢梁相費汎碑

右漢梁相費汎碑在湖州其額題漢故梁相費君之碑  
碑云梁相諱汎字仲慮此邦之人也其先季文為魯大

結一廬朱氏廣餘叢書



夫有功封費因以爲姓秦項兵起避地於此遂留家焉  
余家所收姓氏文字粗備以諸書參考頗多牴牾不合  
姓苑云費氏禹後漢有長房蜀志有丞相禕又云今瑯  
邪亦有此姓音父位反李利涉編古命氏云費氏出自  
魯桓公少子季友有勳於社稷賜汶陽之田封邑於費  
子孫氏焉漢有費將軍其後有費忠費柔柔適蜀爲甯  
蜀人忠之孫徙於荊州後遷江夏忠十代孫奕奕孫禕  
又家於蜀晉平蜀禕之子承復歸江夏林寶元和姓纂  
云費氏亦音祕史記紂幸臣費中夏禹之後楚有無極

一廬朱氏牘餘叢書

漢有直蜀有禕晉有詩又云瑯邪費氏直之後也陳湘  
姓林云費氏音蜚夏禹之後余嘗考之此字有兩姓音  
讀不同源流亦異其一音蜚嬴姓出於伯翳史記所載  
費昌費中楚費無極漢費將軍費直費長房蜀費禕之  
徒是其後也其一音祕姬姓出於魯季友姓苑所載瑯  
邪費氏而此碑所謂梁相費君是其後也然則姓苑姓  
纂姓林皆云夏禹之後姓纂又云亦音祕及謂瑯邪費  
氏爲直之後皆其差誤而編古命氏以費將軍費禕之  
徒出於魯季友亦非也余又按春秋僖公賜季友汶陽



之田及費而左傳亦以謂季友有功於魯受費以爲上卿今以爲季文有功封費者蓋碑之誤

漢堂邑令費君碑

右漢堂邑令費君碑云惟熹平六年無射之月堂邑令費君寢疾卒嗚呼哀哉於是夫人元弟卜膺追而誅之其後有銘詩碑所述費君事不甚詳悉而其名字世次官秩具載於碑陰今附於後

漢費君碑陰

右漢費君碑陰云君諱鳳字伯蕭梁相之元子九江太

續一廬朱氏贖餘叢書

守之長兄也世德襲爵銀艾相亞又云君踐郡右職三貢獻計漢安二年吳郡太守東海郭君以君有委蛇之節自公之操年三十一舉孝廉拜郎中除陳國新平長遂宰堂邑其後爲五字韻語詞頗古雅而時時殘缺不可次序其前題君暘家中孫甘陵石勛字子才所述云

漢太尉陳球碑

右漢太尉陳球碑球有兩碑皆在下邳其一已殘缺此碑差完可考前代碑碣與史傳多牴牾而球碑所載官閱事跡與傳合東漢之末政在闔寺威福下移其勢蓋



可畏也而一時眾君子猶奮不顧身力排其姦雖遭屠戮而不悔志雖不就然亦可謂壯哉如球是已使當時士大夫能屈己以事之則富貴可長保矣然君子固未肯以彼而易此也

漢華嶽碑

右漢華嶽碑集古錄云碑以周禮職方氏爲識方氏者疑當時周禮之學自如此蓋識誌其義通也余按袁逢華嶽碑亦引職方氏乃用識字蓋漢人簡質字相近者輒假借用之初無意義爾

結一廬朱氏贍餘叢書

漢太尉郭禧碑

右漢太尉郭禧碑文字殘缺所存才百許字其可見者公諱禧字君房而已禧郭躬從孫也其事跡附見躬列傳云少明習家業兼好儒學有名譽延熹中爲廷尉建寧二年代劉寵爲太尉而靈帝紀亦云是年十一月禧爲太尉章懷太子注云字公房扶溝人也郭氏世爲陽翟人自躬以下皆葬陽翟其墓尙存今此碑缺處猶有陳留扶溝字疑禧嘗寓居是邑其卒也返葬故郡而漢書注遂以爲扶溝人恐誤



漢郭禧碑陰

右漢郭禧碑陰其首有四大字云故吏人名其下列故吏密張立度成偃師張協子通雒陽李蒼子考故民河南陰德紀信以下凡百餘人又有右河南右河內郡右弘農郡右扶風郡字畫完好者甚多筆法淳古可愛

漢郭禧後碑

右漢郭禧後碑殘缺尤甚其略可辨者云惟光和二年夏五月甲寅太中大夫故太尉郭公薨又云公之肩子故五原太守餘不復成文而其額題漢故太尉郭公神

結一廬朱氏贖餘叢書

道字畫尚完云後漢書列傳既不載禧所終而靈帝紀但云建甯三年夏四月太尉郭禧罷亦不言其爲何官今以碑考之乃知其罷爲太中大夫而卒於光和二年也五原太守名鴻後爲同隸校尉封成安鄉侯

漢樊毅西嶽碑

右漢樊毅西嶽廟碑云弘農太守河南樊君諱毅歐陽文忠公集古錄云據此碑乃卽時所立而太守生稱諱者何哉按春秋左氏傳周人以諱事神名終將諱之而禮卒哭乃諱鄭氏以謂敬鬼神之名也諱避也生者不



相避名衛侯名惡大夫有石惡君臣同名春秋不非又漢宣帝元康二年詔曰聞古天子之名難知而易諱也今上書觸諱以犯罪者朕甚憐之其更諱詢諸觸諱在令前者赦之蓋卒哭而諱其名實始於周而生死皆稱諱西漢已如此矣然則生日名死曰諱又出於近世也有以見後世忌諱愈密如此然生而稱諱見於石刻者甚眾不獨此碑也

漢禹廟碑

右漢禹廟碑云光和二一年十二月丙子朔十九日甲午

和一廬朱氏贖餘叢書

皮氏長南陽章陵劉尋孝嗣丞安定烏氏樊璋元孫其後敘禹平水土之功而最後有銘文多殘缺不能盡識碑在龍門禹廟

漢冀州從事郭君碑

右漢郭君碑名字已殘缺其額題曰冀州從事郭君之碑碑云其先出高辛興自於周

缺字

蕃虞郭在河魏之

閒遭晉荒疆乃喪厥土奕世孳孳職思其勳子孫纓布家於樂土因國爲氏又云歷郡諸曹掾史主簿督郵五官掾功曹又云光和二一年終三年十月葬又云哀哀考



妣追惟賈靈卜商號咷喪子失明據此乃父母生而稱考妣也爾雅云父爲考母爲妣郭璞注引禮記生日父母妻終曰考妣嬪今世學者從之而璞援據諸書以爲非生死之異稱猶今謂兄爲舅妹爲媚爾今此碑漢人所爲已不用戴氏之說以此知璞爲有據然禮經行於世久既有此論事親者所當避也

漢逢童碑

右漢逢童碑刻畫完好云童子諱盛字伯彌薄令之玄孫遂成君之曾孫安平君之孫五官掾之長子也又云

和一廬朱氏贖餘叢書

年十有二歲在協洽五月乙巳噓喻不反天隕精晃於是門生東武孫理下密王升等共刊石敘述才美以銘不朽焉其後題光和四年四月五日丁卯立碑舊在濰州昌邑縣近歲移置郡中云

漢逢童碑陰

右漢逢童碑陰題云右家門生右縣中士大夫凡十三人有督郵璉敏賓璉后升司文叔盛姓字按璉與司文姓氏書皆不載今誌於此

漢三公碑



右漢三公碑歐陽公集古錄有北嶽碑云文字殘缺尤甚其可見者曰光和四年以此知爲漢碑爾其文多言珪幣牲酒黍稷豐穰等事其後二人姓名偶可見云南陽冠軍馮巡字季祖甘陵夏方字伯陽余嘗託人於北嶽訪求前代刻石幾盡獨無漢碑今此碑所書事及二人姓名與集古所載皆同又光和四年立惟其額題曰三公之碑而集古以爲北嶽碑豈歐陽公未嘗見其額乎三公者山名其事亦載於白石神君與無極山碑三山皆在真定元氏云

結一廬朱氏贖餘叢書

### 漢穀阮君神祠碑

右漢穀阮君神祠碑歐陽公集古錄云穀阮君祠今謂之五部神廟其像有石隄西栽樹谷五樓先生東臺御史王翦將軍莫曉其義今此碑有云石隄樹谷南通商雒又云前世通利吏民興貴有御史大夫將軍牧伯故爲立祠以報其功乃知石隄樹谷御史將軍之號自漢以來有之流俗相傳其所從來遠矣而水經注鄭縣城南山北有五部神廟前有碑光和四年鄭縣令河東裴畢字君先立又知五部神自齊魏間已有此號矣裴



君水經注以爲名畢而集古錄云名<sup>睦</sup>今詳其點畫頗近畢字疑集古錄誤

漢穀阮君神祠碑陰

右漢穀阮君神祠碑陰縣吏及鄉人題名其完好可識者二百餘人摩滅者又百餘人小字<sup>淳</sup>勁可喜歐陽公集古錄所未嘗有也

漢無極山碑

右漢無極山碑按顏之推家訓曰詩云有澠萋萋興雲祁祁毛傳云澠陰雲貌萋萋雲行貌祁祁徐也箋云古

結一廬朱氏贖餘叢書

者陰陽和風雨時其來祈祁然不暴疾也按澠已是陰雲何勞復云興雲祁祁邪雲當爲雨俗寫誤爾班固靈臺詩云習習祥風祁祁甘雨此其證也據此則本作雲字之推改爲雨耳而陸德明經典釋文亦云本作興雲非也蓋德明據顏氏說改之故後來本皆作雨今此碑銘文有曰興雲祁祁雨我公田遂及我私乃知漢以前本皆作興雲顏氏說初無所據特私意耳

漢揚州刺史敬使君碑

右漢敬使君碑在河東平陽其額題云漢揚州刺史敬



君之銘碑已殘缺其名字皆亡略可辨者嘗辟司隸從事又爲治書御史最後云年五十三光和四年閏月遭疾而卒其他不復可考按姓苑載風俗通有敬歆漢末爲揚州刺史元和姓纂亦云歆平陽人而後周書敬珍傳唐書宰相世系表歆皆作韶余後得後魏敬曦造像碑亦作韶乃知姓苑姓纂之謬又集古錄此碑凡再出其一題敬仲碑云名字已摩滅獨首有敬仲字故寓其名耳疑其人姓田也其一題無名碑所載事皆同蓋歐陽公未嘗見其額耳

結一廬宋氏賸餘叢書

### 漢藁長蔡湛頌

右漢藁長蔡君頌云君諱湛字子德河內修武人也又云舉孝廉辭讓應司徒府除廣川長復辟太尉熹平四年六月詔書其下斷缺似是敘述遷藁長及在官政績又云三年遷高邑令吏民追思於是故吏栗尹等相與合會立碑起頌刊斯石焉其後有銘最後題光和四年十二月詔書遷并州刺史其大略如此其他文字殘缺不可考矣

### 漢蔡湛碑陰



右漢蔡湛碑陰載出錢人名有故吏賤民議民故三老  
故處士義民其稱故吏義民之類他漢碑多有之唯議  
民賤民獨見於此碑然莫詳其義

漢安平相孫根碑

右漢安平相孫根碑云府君諱根字元石司空公之伯  
子樂安太守之兄子漢陽太守侍御史之兄乘氏令之  
考厥先出自有殷（玄）商之系子湯之苗又云聖武定周  
封比干之墓（脩）齋分析避地匿軌姓曰孫焉又云遷鄆  
長雍奴令換元氏考城令諫議大夫拜議郎謁者遷荆

結一廬朱氏賸餘叢書

州刺史徵拜議郎遷安平相年七十有一光和四年十  
二月乙巳卒碑在今高密縣所謂司空公者桓帝紀永  
壽三年太常孫朗爲司空注云朗字代平北海人漢三  
公名亦云朗北海高密人余嘗觀漢時碑碣載其家世  
皆止書官爵蓋爲子孫作銘不欲名其父祖爾此最爲  
得體然非當代顯人則遂莫知其爲何人也又按姓苑  
姓纂諸書皆云孫氏周文王子衛康叔之後衛武公子  
耳爲衛上卿因氏焉今此碑乃云出於商比干之後蓋  
古人或因賜姓命氏或以官或以諡或以封或以居或



三〇四十九  
金十七  
以王父字爲氏故姓氏雖同而源流或異書傳闕漏不載者多矣

漢涼州刺史魏君碑

右漢涼州刺史魏君碑文字殘缺族系名字皆不可考其粗可見者察孝廉除郎中尙書侍郎右丞卒於光和四年而其額題涼州刺史魏君碑云


漢碭孔君神祠碑

右漢碭孔君神祠碑其前題漢故行梁相事碭孔君之神祠文詞字畫皆古怪而不工又時有難曉處然刻畫


結一廬朱氏贖餘叢書

甚完好孔君者名耽字伯本

金石錄卷之十七







金石錄卷之十八

結一廬朱氏臚餘叢書

金石錄卷之十八

跋尾八

漢成陽令唐君頌

漢唐君碑陰

漢白石神君碑

漢幽州刺史朱龜碑

漢朱龜碑陰

漢都鄉正街彈碑

漢太尉劉寬碑

漢劉寬碑陰



漢尉氏令鄭君碑

漢趙相劉衡碑

漢陳君碑

漢陳仲弓碑

漢陳仲弓碑陰

漢陳仲弓壇碑

漢圍令趙君碑

漢周公禮殿記

漢巴郡太守樊君碑

結一盧朱氏贖餘叢書

漢綏民校尉熊君碑

漢宗資墓天祿辟邪字

漢司空宗俱碑

漢馮使君墓闕銘

漢高陽令楊君碑陰

漢浚儀令衡立碑

漢光祿勳劉曜碑

漢成陽令唐君頌

右漢成陽令唐君頌云君諱扶字正南字畫尙完而歐



陽公集古錄乃云其名殘缺何哉碑額題漢故成陽令  
唐君之頌在今濮州雷澤縣古成陽也

漢唐君碑陰

右漢唐君碑陰載出錢造碑人有故從事故督郵故吏  
處士門生門童等姓名按唐君碑云處士閻葵班等刻  
石樹頌而碑陰又有故吏閻葵巴處士閻葵楚閻葵姓  
不見於前史而姓苑姓纂之類亦皆不載蓋前代氏族  
或因改易或淒微不顯遂泯沒而無傳者甚眾今世所  
有姓氏書類多簡略不完惟時時見於石刻者余每記

結一廬朱氏賡餘叢書

之以裨姓氏書之闕云

漢白石神君碑

右漢白石神君碑其略云白石神君者居九山之數參  
三條之一兼將軍之號秉斧鉞之威體連封龍氣通北  
岳幽讚天地長育萬物觸石而出膚寸而合不終朝日  
而澍雨沾洽前後國縣屢有所請指日刻期應時有驗  
猶自挹損不求禮秩縣界有六名山三公封龍靈先得  
法食去光和四年三公守民蓋高等始爲無極山詣太  
常求法食相縣以白石神君道德灼然乃具載本末上



尚書求依無極卽蒙聽許於是遂開拓舊兆改立殿堂  
其餘首尾尙皆完好可讀文多不備載其曰居九山之  
數參三條之一莫曉爲何語也

漢幽州刺史朱龜碑

右漢幽州刺史朱龜碑在今亳州酈道元注水經云渦  
水東逕朱龜墓北東南流冢南枕道有碑題云漢故幽  
州刺史朱君之碑龜字伯靈光和六年卒官今以碑考  
之與道元所載皆合歐陽公集古錄云龜之事跡不見  
史傳獨見於此碑爾余按後漢書西南夷傳熹平五年

結一廬朱氏胎餘叢書

諸夷反叛執蜀郡太守雍陟遣御史中丞朱龜討之不  
能克太尉掾李<sup>顒</sup>建策討伐乃以<sup>顒</sup>爲益州太守發板  
楯蠻擊破平之常璩華陽國志亦載其事與史同惟史  
與華陽國志皆言龜不能克而碑云蠻夷授手乞降二  
說不同疑碑所書非實錄也

漢朱龜碑陰

右漢朱龜碑陰文字殘缺初余讀酈道元注水經云朱  
龜碑陰故吏名姓多上谷代郡人知此碑有陰因託人  
就毫社模得之附於碑後



漢都鄉正街彈碑

右漢都鄉正街彈碑在汝州界故昆陽城中文字摩滅不可考究其歲月略可見蓋中平二年正月而其額題都鄉正街彈碑莫知其爲何碑也

漢太尉劉寬碑

右漢太尉劉寬碑寬有兩碑皆在洛陽上東門外官道旁此碑據藝文類聚乃植麟撰後碑不知何人所爲然字體則同也

漢劉寬碑陰

結一陸朱氏贖餘叢書

右漢劉寬碑陰寬兩碑皆有陰此後碑陰也唐咸亨中碑仆於野其裔孫周王記室參軍爽字元爽重爲建立寬以中平二年卒據靈帝紀以光和七年十二月改元中平以麻推之是歲甲子至明年當爲乙丑而爽書爲甲子誤矣

漢尉氏令鄭君碑

右漢尉氏令鄭君碑云君字季宣聘君之孫而其名已殘缺其它字畫時有可識處皆斷續不成文理略可見者年五十有七卒於中平二年而碑陰題尉氏故吏處



士人名知其爲尉氏令爾

漢趙相劉衡碑

右漢趙相劉衡碑云君諱衡字元宰濟南東平陵人也  
厥先尚矣聖漢龍興其下殘缺又云爰啟冀土遷於岱  
陰自康侯以來奕世丕承又云勃海王帝之冢弟不遵  
憲典君以特選爲郎中令以兄瑯琊相憂即日輕舉州  
察茂材除脩令遷張掖屬國都尉以病徵拜議郎遷東  
東下缺  
一字 屬國都尉不行拜趙相在位三歲拜議郎年五  
十有三以中平四年二月戊午卒其四月己酉葬其餘

經一廬宋氏贖餘叢書

文字完好者尙多按後漢書敦海王名悝桓帝弟也衡  
墓與碑在今齊州歷城縣界中古平陵城旁余嘗親至  
墓下觀此碑因模得之墓前有石獸制作甚工云

漢陳君碑

右漢陳君碑文字殘缺不完其略可識者云君諱度字  
妙高陳國相人又云武王克商封先代之後以元女太  
姬配胡公至厲公生公子完奔齊其後斷續不復成文  
而最後題中平四年九月二十日己丑立云

漢陳仲弓碑



右漢陳仲弓碑其額題云漢文範先生陳仲弓之碑文字已殘滅蔡邕字畫見於今者絕少故雖漫滅之餘尤爲可惜以校集本不同者已數字惜其不完也按邕集仲弓三碑皆邕撰其一碑云中平三年秋八月丙子卒而三碑皆云春秋八十有三後漢書仲弓傳以爲中平四年年八十四卒於家者疑傳誤

漢陳仲弓碑陰

右漢陳仲弓碑陰故吏姓名多已剝缺蔡邕小字八分惟此與石經遺字爾石經字畫謹嚴而此碑陰尤放逸

縮一廬朱氏贖餘叢書

可愛

漢陳仲弓壇碑

右漢陳仲弓壇碑其額題故太正長潁川陳君壇其他文字摩滅不可盡識按蔡邕集有仲弓三碑以集本校之此碑非邕撰者然字畫亦奇偉惜其殘缺不完也

漢圍令趙君碑

右漢圍令趙君碑其額題漢故圍令趙君之碑而最後題初平元年十二月二十八日立碑已殘缺名字皆不可考所可見者有云郡仍署五官掾功曹州辟從事司



徒楊公辟遷圍令播德二城風曜穆清被疾去官年六十有八以中平五年冬十一月卒後有銘詩特完好其辭云天寔高惟聖同戲我君羨其縱體弘仁蹈中庸所臨歷有休功追景行亦難雙刊金石示萬邦其詞頗爾雅故錄之

漢周公禮殿記

右漢周公禮殿記者今成都府學有漢時所建舊屋柱皆正方上狹下闊此記在柱上刻之靈帝初平五年立距今蓋千年矣而字畫完好可讀當時石刻在者往往

結一廬朱氏贖餘叢書

摩滅此記託於屋楹乃與金石爭壽亦異矣記有云甲午年故府梓潼文君增造吏舍二百餘間按華陽國志有文參字子奇梓潼人平帝用爲益州太守不從王莽公孫述光武嘉之疑此記所載卽其人也蓋光武建武十年歲次甲午云

漢巴郡太守樊君碑

右漢巴郡太守樊君碑云君諱敏字昇達肇祖宓戲遺苗后稷爲堯種樹舍潛於岐天顧亶甫乃萌昌發周室衰微霸佐匡弼晉爲韓魏魯分爲揚充曜封邑厥土河



東楚漢之際或居於楚或集於梁君纘其緒華南西畧  
又云總角好學治嚴氏經貫穿道度無文不覩於是國  
君備禮招請濯冕題冠傑立忠蹇有夷史之直卓密之  
風鄉黨見歸察孝除郎丞昌長史遷宕渠令大將軍辟  
光和之末京師擾攘雄狐綏綏冠履同囊投核長驅畢  
志枕丘國復重察辭病不就再奉朝聘七辟外臺常爲  
治中諸部從事又云季世不祥米巫凶瘡姦狡並起陷  
附者眾君執一心賴無汚恥復辟司徒道隔不往牧伯  
劉公表授巴郡以助義都尉養疾閭里又行褒義校尉

結一廬朱氏贖餘叢書

年八十有四歲在汴洽紀驗期臻奄忽臧形其後有銘  
最後題建安十年二月上旬造他漢碑類多刊缺而此  
碑獨首尾完好故載其大略於此所謂米巫凶瘡者謂  
張角也

漢綏民校尉熊君碑

右漢綏民校尉熊君碑其名字皆殘缺其額題漢故綏  
民校尉騎都尉桂陽曲紅灌陽長熊君之碑初余得桂  
陽太守周君碑陰據水經注以爲曲江漢時本名曲紅  
今此碑及額亦皆作紅乃知酈道元爲有據也



漢宗資墓天祿辟邪字

右漢天祿辟邪字在南陽宗資墓前石獸膊上歐陽公

集古錄按黨錮傳云資祖均自有傳見章懷太子注今後漢書

有宋均傳云南陽安眾人而無宗均傳疑黨錮傳轉寫

宋爲宗爾蜀志有宗預南陽安眾人豈安眾當漢時有

宗宋二族而字與音皆相近遂至訛謬耶此說非是余

按後漢書均族子意傳云意孫俱靈帝時爲司空而靈

帝紀建甯四年書太常宗俱爲司空注云俱字伯儷南

陽安眾人延熹二年書司空宗俱薨又姓苑載南陽安

結一廬朱氏賡餘叢書

眾宗氏云後漢五官中郎將伯伯子司隸校尉河內太守均均族兄遼東太守京京子司隸校尉意意孫司空俱元和姓纂所書亦同則均姓爲宗無可疑者當章懷太子爲注及林寶撰姓纂時尚未差謬至後來始轉寫爲宋爾余旣援據詳審遂於家藏後漢書均列傳用此說改定云

漢司空宗俱碑

右漢司空宗俱碑云公諱俱字伯儷南陽安眾人也而其額題漢故司空宗公之碑按後漢書宋均傳均族子



意意孫俱靈帝時為司空余嘗得宗資墓前石獸膊上刻字因以後漢帝紀及姓苑姓纂等諸書參考以謂自均而下其姓皆當作宗而列傳轉寫為宋誤也後得此碑益知前言之不謬碑已殘缺不成文理而官秩名字鄉里特完故詳著之

漢馮使君墓闕銘

右漢馮使君墓闕銘云故尚書侍郎河南京令豫州幽州刺史馮使君神道按後漢書馮緄傳緄父煥安帝時為幽州刺史而緄碑亦云幽州君之元子此字在宕渠

結一盧朱氏賡餘叢書

緄墓前雙石闕上知其為煥闕也

漢高陽令楊君碑陰

右漢高陽令楊君碑陰歐陽公集古錄云余家集錄得楊震墓域中漢碑四震及沛相繁陽高陽令碑并得碑陰題名然得時參錯不知為何碑之陰也集古所有余盡得之又各以碑陰附於碑後其曰白陵園令蔣禧字武仲者沛相碑陰也其曰故吏故民故功曹史故門下佐者繁陽令碑陰也其曰右後公門生右沛君門生者高陽令碑陰也



漢浚儀令衡立碑

右漢浚儀令衡立碑云君諱立字元節其先出自伊尹而其銘曰於穆從事歐陽公集古錄號爲元節碑且云疑其姓伊而爲從事也今碑首尙完題云浚儀令衡君之碑蓋漢時石刻其官爵姓氏旣載於額則其下不復更著苟文已殘缺又不見其額則遂難考究矣立與衛尉卿衡方墓皆在今鄆州中都方碑亦云其先伊尹號稱阿衡因以氏焉

漢光祿勳劉曜碑

右漢光祿勳劉曜碑集古錄云君諱曜字季尼年七十三其餘爵里官闕卒葬歲月皆不可見今此碑雖殘缺然尙有可考慮蓋孝文之裔又嘗爲太官令郎中居延都尉大宗正衛尉遂爲光祿勳至於卒葬年月則斷續不可考矣

結一盧朱氏賸餘叢書

金石錄卷之十八



金石錄卷之十九

漢張侯殘碑

漢荊州從事苑君碑

漢趙相離府君碑

漢逢府君墓石柱篆文

漢永樂少府賈君闕銘

漢酸棗令劉熊碑

漢臨朐長仲君碑

漢蜀郡太守任君神道

跋尾九  
漢

結一廬牛日贖餘叢書



漢蜀郡屬國都尉王君神道

漢司空殘碑

漢益州太守楊宗墓闕銘

漢益州刺史薛君巴郡太守劉君碑

漢巴郡太守張君碑

漢南陽太守秦君碑額

漢河南尹蘇府君碑額

漢禹廟碑

漢禹廟碑陰

結一廬朱氏賸餘叢書

漢司空掾陳君碑額

漢武氏石室畫像

戚伯著碑

四皓神位刻石

相府小史夏堪碑

郭先生碑

漢張侯殘碑

右漢張侯殘碑張侯者子房也碑已斷裂摩滅不可次序獨其額尚完題漢故張侯之碑在今彭城古留城子



房廟中驗其字畫蓋東漢時所立樂史寰宇記陳留縣有張良墓引城冢記云張良封陳留侯食邑小黃一萬戶漢爲良築城因名張良城今陳留有子房廟廟貌甚盛余按西漢書地理志注留屬陳故稱陳留宋亦有留彭城留是也子房傳曰始臣起下邳與上會留臣願封留足矣下邳與彭城相近而此碑漢人所立乃在彭城然則子房所封非陳留明矣城冢記誕妄蓋不足信也

漢荊州從事苑君碑

右漢苑鎮碑其略云漢故荊州從事苑君諱鎮字仲弓

結一廬朱氏贖餘叢書

南陽人也其先出自苑柏何爲晉樂正世掌朝禮之制又云有苑子園實能掌陰陽之理君卽其胄也按姓氏書皆云苑氏出於左傳所載齊大夫苑何忌之後今此碑所謂苑柏何與子園左傳國語皆無其人故錄之以待知者

漢趙相雒府君碑

右漢趙相雒府君碑其前歷敘家世官爵而所述雒君事甚略云府君名勸孝廉成皋令趙國相又云在官五載莅政清平有甘棠之化年四十五卒於官故吏民漢



中太守邯鄲某等

其名殘缺

慕戀恩德刊石稱頌焉又有闕

銘題漢故趙國相離府君之闕云

漢逢府君墓石柱篆文

右漢逢府君墓石柱篆文云漢故博士趙傳逢府君神道唐李利涉編古命氏北海逢氏有名絲字子繡者為漢趙王傅其孫萌不仕王莽蓋前漢時人今逢君北海人又為趙傅疑其是也而濰州圖經北海縣有逢汾墓云汾好學以德義聞徵為博士趙王傅卒門人執衰絰者數百葬於寒亭南四里今此篆文既不載其名皆莫

結一廬朱氏賡餘叢書

可考然圖經所載逢君事首尾甚詳不知何以知其名汾必別有所據又疑絲與汾兩人前後皆嘗為趙王傅未可知也故并載之以待知者

漢永樂少府賈君闕銘

右漢永樂少府賈君闕銘按漢書桓帝母孝崇匱皇后居永樂宮和平元年詔置太僕少府如長樂故事其後靈帝母孝仁董皇后亦居是宮歐陽公集古錄引章懷太子注云漢官儀長樂少府以宦者為之則賈君蓋亦宦者也余以漢史及石刻考之當時三公如陳球劉寬



三ノナニ  
金一ノ  
皆嘗爲此官非獨一人蓋自西漢以來太后皇后官屬如大長秋之類皆參用士人然則漢官儀以爲止用宦者爲之蓋其闕漏而集古錄遂以賈君爲宦者亦未必然也

漢酸棗令劉熊碑

右漢劉熊碑在今酸棗縣云君諱熊字孟孟下缺一字按酈道元注水經酸棗城內有漢縣令劉孟陽碑今據碑熊實爲此縣令然則所缺一字當從水經爲陽也碑又云君光武皇帝之玄孫廣陵王之孫俞鄉侯之季子

結一廬朱氏騰餘叢書

也按後漢書光武子廣陵思王荆以譴死顯宗封其子元壽爲廣陵侯又封元壽弟三人皆爲鄉侯而李利涉編古命氏唐書宰相世系表皆云荆生俞鄉元侯平平生彪襲封今據熊當爲彪之弟然則於光武乃其曾孫而曰玄孫者疑碑誤

漢臨胸長仲君碑

右漢臨胸長仲君碑文字摩滅其粗可見者云君諱雄又云歷郡五官掾功曹史辟從事舉孝廉除郎中遷臨胸長而其額題故臨胸長仲君碑云



漢蜀郡太守任君神道

右漢蜀郡太守任君神道九字字畫壯偉然不著名字鄉里歲月莫詳其爲何人也

漢蜀郡屬國都尉王君神道

右漢王君神道在南陽云漢故蜀郡屬國都尉王君神道封陌按酈道元注水經清水南道側有二石樓制作精妙題言蜀郡太守姓王字子稚南陽西鄂人有三女無男而家累千金父沒當葬三女各出錢五百萬一女築墓一女建樓今此碑後有唐向城令張璿之撰孝女

結一廬朱氏膾餘叢書

雙石樓記所書與水經注合惟水經誤以都尉爲太守耳璿之記天寶七載建別錄於後

漢司空殘碑

右漢司空殘碑政和乙未歲得於洛陽天津橋之故基首尾已不完所存四十五字字畫奇偉其詞有云命爾司空余回爾輔據此乃嘗爲三公蓋當時顯人惜其不見名氏也碑陰有故吏題名百餘人尤完好筆法不減蔡邕石經云

漢益州太守楊宗墓闕銘



右漢楊宗墓闕銘在蜀中凡十六大字云漢故益州太守楊府君諱宗字德仲墓闕汶陽李長茂爲蜀使者罷歸以此本見遺長茂名公年東州善士以畫山水著稱者

漢益州刺史薛君巴郡太守劉君碑

右漢薛君劉君碑已斷裂不完惟存上一段而其額尙全題漢故益州刺史中山相薛君巴郡太守宗正卿成平侯相劉君碑古無兩人共立一碑者惟見於此爾

漢巴郡太守張君碑

結一廬朱氏贖餘叢書

右漢巴郡太守張君碑其前題巴郡太守都亭侯張府君功德敘云君諱納字子朗勃海南皮人也又云炎漢龍興留侯維幹枝裔滋布並極爵秩又云察孝除郎中尙書侍郎遷甘陵冤句令親病去官辟司空司徒府復辟太尉舉高第拜侍御史揚州寇賊陸梁作難五府表君中丞督捕又云丙子璽書封都亭侯碑無卒葬年月其後頗敘述政績而繫以銘詩蓋巴郡太守德政碑爾按漢史自安順以來揚州寇賊屢發不知張君爲中丞督捕在何年也



漢南陽太守秦君碑額

右漢南陽太守秦君碑額文字已摩滅惟其額十大字  
尙完好故名字歲月皆莫可考按後漢書靈帝紀中平  
三年二月江夏兵趙慈反殺南陽太守秦頡或云此卽  
頡碑也然酈道元水經注載頡墓與碑皆在宜城此碑  
乃在南陽或是郡人所立德政頌爾

漢河南尹蘇府君碑額

右漢河南尹蘇府君碑額題漢故河南尹蘇府君碑今  
宣州太守張叔夜嵇仲見寄云在許州道旁碑無文詞

和一廬朱氏贗餘叢書

惟此十字其額爾按東漢時蘇氏最顯者惟蘇章嘗以  
河南尹徵不就其他無尹河南者意其爲章碑也然章  
扶風平陵人而碑乃在許昌未知果是否

漢禹廟碑

右漢禹廟碑字畫淺細故摩滅尤甚其事跡歲月皆不  
可考略可見者云皮氏長安定蘇而名字亦不能辨矣

漢禹廟碑陰

右漢禹廟碑陰自候長汾陰趙遺子宣而下凡數十人  
姓名官爵具存又有故督郵曹史縣功曹鄉部吏柏昱



等人名最後有龍門復民三十五戶人名在今龍門禹廟殘碑之陰而集古錄云在閩鄉楊震墓側又云楊氏子孫當時皆葬閩鄉碑碣往往摩滅此不知爲誰碑者蓋誤也

漢司空掾陳君碑額

右漢司空掾陳君碑額碑已殘缺不可辨惟其首八大字尙完字畫奇偉在潁川陳太丘墓側按後漢書太丘傳載二子紀譔紀爲大鴻臚譔不著其爲何官惟劉孝標注世說引海內先賢傳曰譔字季方寔少子也司空

結一廬朱氏贖餘叢書

掾公車徵不就蚤卒然則斯碑豈非陳譔碑乎

漢武氏石室畫像

右漢武氏石室畫像五卷武氏有數墓在今濟州任城墓前有石室四壁刻古聖賢畫像小字八分書題記姓名往往爲贊於其上文詞古雅字畫遒勁可喜故盡錄之以資博覽

戚伯著碑

右戚伯著碑首尾摩滅其略可見者有云充列王室遇謗於呂委位捐爵而其額題周末嗣戚氏襲以興敦海



君④孫伯著之碑知其姓戚以文詞字畫驗之疑東漢中葉以前人蓋當時石刻見於今者多類此所謂充列王室遇謗於呂者戚夫人也

四皓神位刻石

右四皓神位神胙几刻石四在惠帝陵旁驗其字畫蓋東漢時書按顏師古匡謬正俗引圜稱陳留風俗傳自序云圜公之後圜公為秦博士避地南山漢祖聘之不就惠太子即位以圜公為司徒自圜公至稱十一世按班固述四皓但有園公非圜公也云當秦之時避地入

結一廬朱氏贖餘叢書

商洛深山則不為博士明矣又漢初不置司徒安得以圜公為之乎稱之說實為鄙野余嘗疑稱著書自述其世系不應妄誕如此及得四皓刻石見其所書亦為圜公乃知稱所述果非臆說蓋當時所傳如此爾至謂圜公為秦博士及惠帝時拜司徒者疑無所據

相府小史夏堪碑

右相府小史夏堪碑云夏堪字叔德帝禹之精苗零陵太守之根嗣也後有銘銘三字語頗古其卒葬年月殘缺字雖不工然漢碑也其曰精苗根嗣漢末人為文喜



造語多類此

郭先生碑

右郭先生碑集古錄以為漢碑按後魏酈道元注水經具載此碑云碑無年號不知何代人然則歐陽公何所據遂以為漢人乎余以字畫驗之疑魏晉時人所為也無歲月可考姑附於漢碑之次云

金石錄卷之十九

金石錄卷之二十

跋尾十  
魏 吳  
晉 偽漢 偽趙

結一廬朱氏贖餘叢書

魏大饗碑

唐重立大饗碑

魏孔子廟碑

魏范式碑

魏太僕荀君碑

魏南郡太守卞統碑

晉南鄉太守司馬整頌

晉南鄉郡建國碑



魏大長秋游君碑

晉咸甯中建

游君碑陰

吳禪國山碑

吳天璽元年斷碑

晉右軍將軍鄭烈碑

晉太公碑

晉雲南太守碑

晉護羌校尉彭祈碑

晉彭祈碑陰

結一廬朱氏贖餘叢書

晉光祿勳向凱碑

晉鴻臚成公重墓刻

偽漢司徒公劉雄碑

鄧艾碑

與下兩碑皆一時西晉立

金鄉長薛君頌

張平子碑

趙浮圖澄造釋迦像碑

趙橫山李君神碑

趙西門豹祠殿基記



晉樂毅論

學生題名

宋武帝檄譙縱文

魏大饗碑

右魏大饗碑按魏志文帝以建安二十五年嗣位為丞相魏王改元延康夏六月南征秋七月甲午軍次於譙大饗六軍及譙父老今以碑考之乃八月辛未蓋魏志誤也是時不為丞相漢獻帝猶在位雖政去王室已久然操之死纔數月爾不軍次舊里初無念親之心乃與

結一廬朱氏贖餘叢書

羣臣百姓置酒高會大設伎樂而臣下又相與伐石勒詞夸耀功德更以夏啟周成漢高祖光武為比豈不可笑也哉

唐重立魏大饗碑

附

右唐重立魏大饗碑大中五年亳州刺史李暨以舊文剝缺再刻於石舊碑既斷續不可盡識而此本特完好故附於其次俾覽者詳焉魏之事跡雖無足取而其文詞工妙亦不可廢也

魏孔子廟碑



右魏孔子廟碑按魏志文帝以黃初二年正月下詔以議郎孔羨爲宗聖侯奉孔子之祀及令魯郡修起舊廟今以碑考之乃黃初元年又詔語時時小異亦當以碑爲正

范式碑

右范式碑法書要錄云蔡邕書今以碑考之乃魏青龍三年立非邕書也

魏太僕荀君碑

右魏太僕荀君碑其額題魏故太僕西陽亭成侯荀府

結一廬朱氏贖餘叢書

君之碑碑已殘缺其可見者嘗爲齊相始平太守大將軍長史封西陽亭侯遂爲太僕春秋五十有一正始五年夏六月丙寅薨惟其名字鄉里摩滅不可考矣

魏南郡太守卞統碑

右魏南郡太守卞統碑碑在今曹州宛句縣所敘世次官闕甚簡又多殘缺其略云君諱統字建業又云惟帝念庸命以南邦又云嘉平二年十一月己亥寢疾卒官而其首題魏故南郡太守卞府君之表按晉書卞壺傳濟陰冤句人祖統瑯邪內史而元和姓纂亦云統爲晉



瑯邪內史今此碑殘缺處猶有瑯邪字尙存知其嘗爲此官而統以魏嘉平中卒姓纂以爲仕晉者誤也

晉南鄉太守司馬整頌

右晉南鄉太守司馬整頌去初仕魏拜郎中中郎議郎諫議大夫騎都尉給事中轉拜治書侍御史咸熙二年出臨鄙郡加宣威將軍又云謁者就郡拜君世子執節四讓推與兄嗣固辭懇誠泰伯三美君又加焉又云泰始三年十一月使者奉詔策命君南中郎將牧統宛口都按晉史整事跡附見安平獻王孚傳後云兄奕卒以

結一盧朱氏贖餘叢書

整爲世子歷南中郎將封清泉侯早卒其餘官闕皆不載據史言兄奕卒以整爲世子而碑言推與兄嗣二說不同當以碑爲正

晉南鄉郡建國碑

右晉南鄉郡建國碑已斷裂不完其額題南鄉郡建國之碑其大略云嘉平五年漢水滔溢毀壞舊城又云正元二年城此其餘文字可識處大略述遷郡事而銘文有與晉常存之語知其爲晉碑也按晉書地理志建安十三年魏武帝盡得荊州之地分南陽縣西界立南鄉



郡及晉武平吳太康中改南鄉爲順陽而不載遷郡事  
此碑蓋太康以前立故仍稱南鄉也碑有云河內司馬  
府君者整也嘗守是郡自有碑此碑旣無建立年月因  
附於整碑之次焉

魏大長秋游君碑

右魏大長秋游君碑云君諱述字庶祖按元和姓纂云  
魏河南尹游述始居廣平六代孫後魏尙書明根生僕  
射肇今碑亦云述廣平人惟姓纂云述爲河南尹以碑  
考之蓋未嘗爲此官又按後漢書百官志大長秋丞秦

結一廬朱氏贖餘叢書

將行宦者景帝時更名大長秋或用士人中興嘗用宦  
者述嘗爲宛句長尙書郎左丞元城令治書侍御史南  
安北海安平東郡太守符節令遂爲大長秋皆非宦者  
之職然則魏制蓋亦參用士人矣

游君碑陰

右游君碑陰按王莽嘗下令禁二名故當時士人皆以  
一字爲名東漢時尙爾今此碑陰所記凡二百五十三  
人亦無一人二名者碑晉咸甯中建距莽時二百年矣  
而士大夫猶遵莽之令不變何哉



吳禪國山碑

右吳禪國山碑其前敘孫皓卽位以後郡國祥瑞凡千餘言其後云乃以浞灘之歲欽若昊天月正革元郊天祭地紀號天璽又云丞相沈太尉璆大司徒變大司空朝等以爲今眾瑞畢至三表納貢九垓八埏罔不被澤率按典繇宜先行禪禮紀勒天命遂於吳興國山之陰告祭刊石以對揚乾命廣報坤德按皓以丙申歲改元天璽碑言浞灘之歲是也皓淫虐無道人神憤疾而羣臣方稱述符瑞讚頌功德蓋刻石後四年遂爲晉所俘

結一廬朱氏贍餘叢書

矣

吳天璽元年斷碑

右吳天璽元年斷碑其前云上天帝言又云帝曰大吳一萬方又云天發神讖文天璽元年七月己酉朔又云天讖廣多不解解者十二字嗚呼其言可謂妖矣據吳志天璽元年秋八月鄱陽言歷陽山石理成字凡二十明年改元大赦以協石文今此碑乃在金陵驗其文與吳志所載亦異莫可考究孫皓在位凡八改元而六以符瑞然竟不能保其國蓋人事不修而假託神怪以矯



誣天命其不終宜矣

晉右軍將軍鄭烈碑

右晉鄭烈碑云君諱烈字休林又云曾祖先生皇祖徵君顯考將作大匠實有茂德載在國策烈晉史無傳以碑考之嘗爲文帝參佐武帝時仕爲兗州刺史封東莞男以疾徵拜議郎卒於太康二年追贈右軍將軍諡曰僖侯云

晉太公碑

右晉太公碑其略云太公望者此縣人大晉受命四海

結一廬朱氏贖餘叢書

一統太康二年縣之西偏有盜發冢而得竹策之書書藏之年當秦坑儒之前八十六歲今以晉書武帝紀考之云咸甯五年汲郡人不準掘魏襄王冢得竹簡小篆古書十餘萬言藏於祕府與此碑年月不同碑當時所立又荀勗校穆天子傳其敘亦云太康二年與碑合可以正晉史之誤其曰小篆書亦謬也且其書旣在秦坑儒八十六歲之前是時安得有小篆乎碑又云其周志曰文王夢天帝服玄襪襪字字書無所以立於令狐之津帝曰昌賜汝望文王再拜稽首太公於後亦再拜稽首文王



夢之之夜太公夢之亦然其後文王見太公而詢之曰  
而名爲望乎答曰唯爲望文王曰吾如有所見於汝太  
公言其年月與其日且盡道其言臣此以得見也文王  
曰有之有之遂與之歸以爲卿士而史記太公世家曰  
西伯將出獵卜之去去於是西伯獵果遇太公於渭之  
陽與語大說曰自吾太公望子久矣故號之曰太公望  
載與俱歸二說殊不合而王逸注楚詞亦載文王夢太  
公事與碑所書略同方逸爲注時此書未出逸必別有  
所據碑又云其紀年曰康王六年齊太公望卒參考年

結一廬朱氏贖餘叢書

數蓋壽一百一十餘歲而史記亦不載按前世所傳汲  
冢諸書獨有紀年穆天子傳師春等不載所謂周志者  
不知爲何書而杜預左氏傳後序云汲冢書凡七十五  
卷皆藏祕府預親見之以此知不特十餘萬言史之所  
記蓋不能盡其亡逸見於今者絕少也太公碑汲縣令  
盧無忌立後題太康十年三月云

晉雲南太守碑

右晉雲南太守碑文字殘缺其姓氏名字鄉里皆不可  
考略可見者嘗爲尙書令史察孝廉除郎中遷武陽令



從龍驤將軍王濬征討遷雲南太守年五十有七卒最  
後題太熙元年三月上旬造太熙武帝年號也

晉護羌校尉彭祈碑

右晉彭祈碑云君諱祈字子玄隴西襄武人也其先出  
自顓頊有陸終之裔子大彭實主夏盟則其後也又云  
歷郡右職州別駕從事於時庸蜀未殄侵擾王略洮西  
之戰因敗運奇元帥獲安剋厭强虜列上功狀除舍人  
還參本軍事除涼州護軍河右未清戎羌鼎沸謀謨神  
略簡在帝心遷西郡太守至官未久復臨酒泉遠夷望

結一廬朱氏瞻餘書

風襁負歸命白山丁令率服賓貢敦煌令狐豐拒違王  
度淵泉之陳兵不血刃母老弟亡辭職去官聖上仁慈  
聽君所求轉略陽太守近家祿養遂罹大艱侍喪還家  
服紀終始有詔以軍州始分河右未清豺狼肆虐授君  
節蓋除護羌校尉統攝涼土前後軍功應封七侯勞謙  
退讓陰德不伐年未知命以太康十年二月癸酉薨天  
子愍悼遣使者監護喪事策曰君秉心公亮所任有方  
不幸殞歿朕甚痛惜故孝廉參護羌軍事酒泉馬朔故  
吏郎中綦毋番主簿郭曉良吏夏侯俊等追思洪烈感



嘆哀嗟乃刊石勒銘焉西晉石刻見於今者絕少又多殘缺此碑文字完好可喜故錄其終始事跡於此

晉彭祈碑陰

右晉彭祈碑陰題名者凡三百十二人有故孝廉計掾計史良吏廉吏計佐主簿領校錄事中部督郵西部督郵軍議從事和戎從事記室督軍謀從事錄事史戶曹史賊曹史金曹史田曹史倉曹史鎧曹史兵曹史客曹史記室史節史車曹史水部都督中部都督功曹典事武猛從事舍人蜀渠都水行事中郎勸農西部勸農東

結一廬朱氏願餘叢書

都水蜀渠平水門下賊曹門下議生錄事金曹掾兵曹掾作部史法曹史參戰騎督步督散督門下書佐弓馬從事監牧史戟史金曹典事武猛史門下通事門下小史凡一官多者十人少者不減數人其餘稱故吏無官號者百六十餘人當時州郡官屬其濫如此蓋自漢以來太守皆得自署置僚佐彭君爲邊郡守故其所辟尤眾今盡錄其名號以見一時之制焉

晉光祿勳向凱碑

右晉向凱碑云君諱凱字士伯河內山陽人也其後歷



敘官閥甚詳其最顯者嘗爲中書侍郎尙書吏部郎給事黃門侍郎賜爵關中侯廣平太守散騎常侍游擊將軍北中郎軍兖州刺史中郎將後云累遷河南尹春秋六十有八元康九年四月甲子薨追贈光祿勳據此乃當世顯人而晉史無傳故其事跡莫得而考蓋君子所賴以傳者非爵位也顧所立何如爾自古老死正壑而名稱顯著者甚眾雖在高位而功烈不見於當時聲跡無聞於後世者亦豈可勝數哉

晉鴻臚成公重墓刻

結一廬朱氏贖餘叢書

右晉成公重墓刻云永甯二年四月辛巳朔十五日乙未守鴻臚關中侯成公重魏夫人之靈柩前世以永甯紀年者三漢安帝晉惠帝僞趙石祇按三國志建安二十一年曹操始置關中侯十七級安帝時猶未有此號而石祇永甯無二年然則重蓋惠帝時人也晉史有成公簡成公綏皆東郡白馬人

僞漢司徒劉雄碑

右僞漢劉雄碑其額題漢故使持節侍中太宰司徒公右部魏成獻王之碑碑云公諱雄字元英高皇帝之胄



孝宣帝玄孫值王莽篡竊遠遁邊朔爲外國所推遂號單于累葉相承家雲中因以爲桑梓焉雄劉元海弟也晉書載記元海本匈奴人冒頓之後漢高祖以宗女妻冒頓約爲兄弟故其子孫遂冒姓劉氏今此碑直云出自宣帝豈元海初起假此以惑眾乎碑後題嘉平五年歲在乙亥二月六日建按宋莒公紀年通譜劉聰以晉懷帝永嘉四年卽僞位改元光興明年改元嘉平嘉平四一改元則嘉平豈復更有五年蓋載記初不編年故於改元歲月難考此碑當時所立不應差謬乃通譜誤

第一廬朱氏賡餘叢書

也

鄧艾碑

與下兩碑皆一時西晉立

右鄧艾碑其額題魏使持節征西將軍方城侯鄧公之碑碑無建立年月以詞考之蓋晉初立按魏晉史其名皆爲艾而碑作乂古艾乂通爲俊乂芟乂乂安之字疑艾名其音如此而今人讀如蕭艾之字恐非是又按艾平蜀卽軍中拜太尉而碑但題爲征西將軍者疑尋被禍未嘗受命而艾始封方城侯後改封鄧侯碑尙云方城侯何哉



金鄉長薛君頌

右薛君頌在今濟州金鄉縣其額題故金鄉長汝南薛君之頌云君諱詣字公謀其他文字皆完好驗其詞蓋縣長德政頌爾雖無建立年月而有吳寇未下缺一字耀威海隅之語知其為晉碑也

張平子碑

右張平子碑晉南陽相夏侯湛撰識緯之說興於西漢之末而爛漫於東漢之世雖一時名儒皆從而惑焉獨平子奮然闢之甚力余嘗歎以為平子可謂豪俊之士

結一廬朱氏賡餘叢書

不為流俗所移者今湛為此碑乃云金匱玉版之奧識契圖緯之文罔不該羅其情可謂不知平子矣

趙浮圖澄造釋迦像碑

右趙浮圖澄造釋迦像碑唐封演聞見記云內丘縣西古中丘城寺有碑後趙石勒光初五年立碑云大和上竺浮圖澄者天竺大國附庸小國王之元子也本姓濕此碑即演所見其說皆同按晉書藝術傳澄本姓帛氏今碑作濕碑當時所立宜得其真又史作佛圖碑作浮圖二字音相近爾惟光初乃劉曜年號而以為石勒時



蓋演誤也

趙橫山李君神碑

右趙橫山李君神碑題建武六年歲在庚子三月己亥二十一日癸丑按晉書成帝紀石虎以咸和九年自立爲趙天王而載記云咸康元年僭稱居攝趙天王據帝紀則建武六年歲在己亥據載記則歲在庚子宋莒公紀年通譜獨以本紀爲據今此碑及西門豹祠殿基記並六年建皆云歲在庚子以此知帝紀之失非二碑則晉紀與載記得失不復可考矣

結一廬朱氏贖餘叢書

趙西門豹祠殿基記

右趙西門豹祠殿基記云趙建武六年歲在庚子秋八月庚寅造西門豹祠殿基又云巧工司馬臣張由監作吏臣杜波馬孫殿中司馬臣王基殿中都尉臣潘倪侍御史騎都尉臣劉誼左校令臣趙升殿中校尉臣顏零等監其下刻物象甚多如土長強良碩章舒懷雀之類其名頗異近歲臨淄縣人耕地得巧工司馬印徧尋史傳皆無此官名不知爲何代物今乃見於此碑云

晉樂毅論



右晉樂毅論石本舊藏高紳學士家集古錄云紳死其子弟以石質錢於富人而富人家失火遂焚其石者非也元祐間余侍親官徐州時故郎官趙竦被旨開呂梁洪挈此石隨行已斷裂用木爲匣貯之竦尤珍惜親舊有求墨本者必手模以遺之竦歿今遂不知所在

### 學生題名

右學生題名歐陽公集古錄以爲漢文翁學生余獨疑其非是蓋以爲西漢時立則字畫不類以爲東漢則東

結一廬朱氏贖餘叢書

漢絕無二名者今此碑二名者凡數人又唐顏有意所書益州學館廟堂記載漢以來石刻皆備獨無此題名使其爲文翁學生決不肯漏落余以字畫驗之疑其爲晉以後人所立然初無所據未敢遂以爲然其後以地里書參考乃決知其非文翁學生也題名有幹江陽趙嵩典學從事史甯蜀常仲舒憲道左生遂甯董朗玄明左生晉原楊容宗長按晉書志江陽郡蜀劉備置甯蜀遂甯晉原並桓溫平蜀後置四郡東西兩漢時皆未自然則此碑爲東晉以後人所立無疑矣



宋武帝檄譙縱文

右宋武帝檄譙縱文按顏有意書成都學館廟堂記云石室北壁有晉義熙九年刺史朱齡石勒宋高祖檄樵縱文其字磨滅不可備識學館記唐初立距今又數百年宜其磨滅愈難識矣然其歲月官爵猶略可辨云

金石錄卷之二十

結一廬朱氏附餘叢書

金石錄卷之二十一

跋尾十一 後魏  
東魏 梁

大代華嶽碑

後魏孔宣尼廟記

後魏孝文帝北干文

後魏比干碑陰

後魏大鴻臚卿鄭伯碑

後魏御射碑

後魏太尉于烈碑

後魏鄭義碑



後魏鄭義上碑

後魏車騎大將軍邢巒碑

後魏叱閭神寶修關城銘

後魏安東將軍孫公墓志

後魏定州刺史崔亮頌

後魏贈司空元暉碑

後魏范陽王碑

後魏賀拔岳碑

東魏膠州刺史祖淮碑

結一廬朱氏贍餘叢書

東魏大覺寺碑

東魏大覺寺碑陰

東魏高翻碑

東魏張烈碑

東魏賈思同碑

東魏魏蘭根碑

後魏化政寺石窟銘

梁重立羊祜碑

東魏敬君像頌



大代華嶽碑

右大代華嶽碑歐陽公集古錄云魏自道武天興元年議定國號羣臣欲稱代而道武不許乃仍稱魏自是之後無改國稱代之事今魏碑數數有之碑石當時所刻不應妄但史失其事耳余按崔浩傳云方士祁纖奏改大代爲萬年浩曰昔太祖道武皇帝應期受命開拓洪業諸所制宜無不循古以始封代土後稱爲魏故代魏兼用猶彼殷商蓋當時國號雖稱爲魏然猶不廢始封故兼稱代爾此事亦見陽松玠談藪云

結一廬朱氏賡餘叢書

後魏孔宣尼廟記

右後魏孔宣尼廟記在今懷州界中文詞頗古質可喜云孔子欲北從趙鞅聞殺鳴犢遂俎車而返及其沒也晉人思之於太行嶺南爲之立廟焉記太和元年立其額又有延興四年太上皇帝祭孔子文者孝文之父獻文帝也

後魏孝文弔比干文

右後魏孝文弔比干文其首已殘缺惟元載字可識其下云歲御次乎闔茂望舒會於星紀十有四日日惟甲



申按爾雅云歲在戊曰闡茂又鄭康成注月令仲冬者日月會於星紀後魏書孝文以太和十八年十一月甲申經比干墓親爲弔文樹碑而刊之是歲甲戌其說皆合其未嘗改元而稱元載者孝文以是歲遷都洛陽蓋以遷都之歲言之也

後魏比干碑陰

右比干碑陰盡紀侍從羣臣官爵姓名按後魏書官氏志正穆陵氏後改爲穆氏今此碑自侍中正曰陵亮以下同姓者凡三人字皆作目而元和姓纂所書與此碑

結一廬朱氏賡餘

正同又碑自穆崇至亮皆姓正目陵氏姓纂亦云後改爲穆而史但云姓穆者皆其闕誤

後魏大鴻臚卿鄭脩伯碑

右後魏鄭脩伯碑元和姓纂載滎陽鄭氏云睦生七子白麟小白叔夜洞林歸藏連山幼麟號七房鄭氏脩伯小白子也按後魏書幼麟傳云父睦生六子又云幼麟五兄長白麟次小白次洞林次叔夜次連山而無歸藏其次第亦不同又姓纂云小白名茂而史云幼麟名義疑自白麟以降皆其字也據碑與姓纂皆云脩伯仕至



大鴻臚卿而史言少卿者誤矣

後魏御射碑

右後魏御射碑在今懷州按北史及魏書宣武紀景明三年十月庚子帝躬御弧矢射遠及一百五十步羣臣勒銘於射所卽此碑也碑云維魏定鼎遷中之十載又云皇上春秋一十有七據史及孝文弔比干文皆云太和十八年遷都洛陽至景明三年蓋九年矣而碑作十載恐誤又史云宣武以太和七年生景明三年當年二十而碑言年十七則當以碑爲據然則宣武終於延昌

卅一廬朱氏贍餘叢書

四年蓋壽三十歲而史以爲壽三十三歲者亦誤也余按禮記問天子國君之年對者皆不敢斥言魯襄公送晉侯晉侯問公年季武子對曰會沙隨之歲寡君以生是也今魏人乃直書其君之年於碑豈禮也哉

後魏太尉于烈碑

右後魏太尉于烈碑云初以功臣子起家爲中散轉屯田給事內都幢將遷左衛將軍而後魏書列傳云少拜羽林中郎遷羽林中郎將以本官行秦雍二州事遷司衛監以碑考之烈皆未嘗爲此官又其父洛拔爲黃龍



鎮都大將而曰和龍烈為屯田給事而曰給納卒年六十七而曰六十五者皆史之誤又按烈始封昌國子改鉅鹿公按烈祖栗禪嘗假封新安公後賜爵新城男疑此亦假封也又改洛陽侯追封聊城縣開國子再進開國伯開國侯其卒追封為鉅鹿郡開國公蓋當時之制如此魏書官氏志不載皆莫可考

後魏鄭義碑

右後魏鄭義碑魏史列傳與此碑皆云義滎陽開封人碑又云歸葬於滎陽石門東十三里三皇山之陽而碑

補一廬朱氏贖餘叢書

乃在今萊州南山之上磨崖刻之蓋道昭嘗為光州刺史即今萊州也故刻其父碑於茲山余守是州嘗與僚屬登山徘徊碑下久之傳云義卒尙書奏諡曰宣詔以義雖宿有文業而治闕廉清改諡為文靈今碑首題曰滎陽鄭文公之碑其末又云加諡為文傳載賜諡詔書甚詳不應差誤而碑當時所立必不敢諱其一字皆莫可知也已

後魏鄭義上碑

右後魏鄭義上碑初余為萊州得義碑於州之南山其



末有云上碑在直南二十里天柱山之陽此下碑也因遣人訪求在膠水縣界中遂模得之義之卒葬滎陽其子道昭永平中爲光州刺史爲其父磨崖石刻二碑焉按地理書後魏皇興四年分青州置光州領東萊郡隋文帝時罷郡仍改光州爲萊州云

後魏車騎大將軍邢巒碑

右後魏邢巒碑云巒字山賓而史作洪賓其爲梁州刺史碑云徵爲都官尙書而史作度支後改爲七兵尙書而史不載又巒爲崔亮所糾據碑言戎車旣班猶以在

結一廬朱氏賡餘叢書

州之誣遭禁一期而史以爲元暉高肇爲巒申釋故得不坐者非也

後魏叱閭神寶修關城銘

右後魏叱閭神寶修關城銘題右將軍西中郎將叱閭神寶銘又云維大魏神龜元年歲次戊午十一月壬午朔十日壬辰起功三十萬修治關城并作館第敬造三級浮圖按後魏書官氏志及元和姓纂有叱閭氏後改爲門而無叱閭氏蓋其闕漏也

後魏安東將軍孫公墓志



右後魏孫公墓誌其名字鄉里年壽皆不載獨其末載贈官制書云故安東將軍銀青光祿大夫棗強縣開國男孫蔚知其名蔚又云歸葬於世邑武遂知其爲邑人也按後魏書儒林傳有孫惠蔚其所書事跡與志皆合傳云先單名蔚正始中侍講禁內夜論佛經有愜帝旨詔使加惠號惠蔚法師焉

### 後魏定州刺史崔亮頌

右後魏崔亮碑題云魏鎮北將軍定州刺史崔使君至化之頌蓋亮嘗爲定州旣去郡人立此碑頌德爾其間

結一廬朱氏賡餘叢書

載亮所歷官甚詳與北史及後魏書列傳多合惟其自定州歸朝歷殿中都官吏部三尙書而傳但言自殿中遷吏部爾亮以正光二年卒而碑神龜三年建在亮卒前故自爲侍中以後事碑皆不及載也

### 後魏贈司空元暉碑

右後魏元暉碑按後魏書列傳云暉鎮西將軍忠子而北史以爲忠弟德之子今以碑考之北史是也又碑云孝文時爲主客郎中而魏史言世宗卽位拜此官碑云神龜二年卒而史言元年卒者亦非是其餘遷拜次第



時有不同不盡錄也

後魏范陽王碑

右後魏范陽王碑云王諱誨高祖孝文皇帝之孫太師武穆王之子今世所傳後魏書北史孝文諸子列傳皆文字脫落不完惟孝明紀載孝昌二年封廣平王懷庶長子誨爲范陽王以此知其爲懷子據碑云懷諡武穆而傳作文穆者誤也誨仕至僕射爲爾朱兆所殺事見莊帝本紀

後魏賀拔岳碑

結一廬朱氏贖餘叢書

右後魏賀拔岳碑岳當時名將也北史及後魏書皆有傳初爲爾朱榮親將其後齊神武使侯莫陳悅害之爾朱榮凶殘狂悖蓋魏之莽卓也而此碑乃以爲圖伊霍之舉豈不可笑也哉然魏收爲魏史受榮子文略之賂亦以榮比韓彭伊霍乃知貪鄙無知之徒世不乏人也按莊帝諸書皆作孝莊而此碑獨作孝壯疑書碑者之誤

東魏膠州刺史祖淮碑

右東魏祖淮碑云君膠州平昌安丘人也六代祖逖又



云其卒贈膠州刺史按後魏永安中分青州置膠州隋開皇五年改爲密州焉

東魏大覺寺碑

右東魏大覺寺碑在洛陽碑陰題韓毅書按北史毅魯郡人工正書神武用爲博士以教彭城景思王攸當時碑碣往往不著名字毅以書知名故特自著之也然遺跡見於今者獨此碑爾

東魏大覺寺碑陰

右大覺寺碑陰題銀青光祿大夫臣韓毅隸書蓋今楷

結一廬朱氏贖餘叢書

字也庾肩吾曰隸書今之正書也張懷瓘六體書論亦云隸書者程邈造字皆真正亦曰眞書自唐以前皆謂楷字爲隸至歐陽公集古錄誤以八分爲隸書自是舉世凡漢時石刻皆曰爲漢隸有一士人力主此論余嘗出漢碑數本問之何者爲隸何者爲八分蓋自不能辨也因覽此碑毅自題爲隸書故聊誌之以祛來者之惑

東魏高翻碑

右東魏高翻碑翻齊獻武王歡叔父也魏書本傳云以元象中追加贈諡碑後題建立歲月文字殘缺惟有魏



元字可辨文云歲次己未按東魏孝靜以元象二年十一月改元興和是年歲次己未此碑蓋元象二年建也

東魏張烈碑

右東魏張烈碑在今青州界中文字摩滅以事考之蓋張烈也按北史列傳烈爲家誠千餘言臨終敕子姪不聽求贈但勒家誠立碣而已卽此碑是也其卒葬年月殘缺不可辨傳亦不載惟青州圖經稱卒於元象中云

東魏賈思同碑

右東魏賈思同碑思同與其兄思伯後魏書皆有傳云

結一廬朱氏贖餘叢書

青州益都人今其墓乃在壽光縣而思伯之碑亡矣

東魏魏蘭根碑

右東魏魏蘭根碑按北史列傳云蘭根起家北海王國侍郎而碑云起家奉朝請遷員外散騎侍郎碑云以在岐州之功封永興縣開國侯而史不載又史云天平初謝病以開府儀同歸本鄉武定三年薨而碑云薨於天平二年其卒也史云贈司空而碑作司徒皆當以碑爲正

後魏化政寺石窟銘



右後魏化政寺石窟銘北史及魏書有宦者抱疑傳云  
疑終於涇州刺史自言其先姓杞後避禍改焉今此碑  
題涇州刺史杞疑造疑後復改其本姓爾

梁重立羊祜碑

右羊祜碑梁大同中以舊碑殘缺再書而刻之碑陰具  
載其事今附於次


東魏敬君像頌

右東魏敬君像頌敬君名曦顯雋從弟也碑云十世祖  
漢揚州刺史韶按後周書敬珍傳唐書宰相世系表皆


結一廬朱氏贖餘叢書

云韶漢末爲揚州刺史與此碑所書同而姓苑元和姓  
纂皆作歆疑傳寫之誤又據碑顯雋乃韶十世孫而姓  
纂以爲九世恐亦誤也

金石錄卷之二十一







一廬朱氏贍餘叢書

金石錄卷之二十二

跋尾十二 後魏  
北齊 後周 隋

後魏鎮東將軍劉乾碑

後魏汝南王碑

北齊造像記

北齊郁久閭業碑

後周延壽公碑頌

後周太學生拓拔府君墓志

北齊華陽公主碑

北齊天柱山銘



後周華嶽廟碑

後周河瀆碑

後周同州刺史普六如忠墓志

北齊隴東王感孝頌

後周溫州刺史烏丸僧修墓志

北齊長樂王尉景碑

北齊馮翊王平等寺碑

北齊臨淮王像碑

北齊白長命碑

結一廬朱氏贖餘叢書

北齊大安樂寺碑

北齊司空趙起碑

北齊贈司空趙奉碑

北齊宜陽國太妃傅氏碑

北齊赫連子悅清德頌

隋興國寺碑陰

隋齊國太夫人楊氏墓志

隋化善寺碑

隋願力寺舍利寶塔函銘



隋周羅暉墓志

隋禹廟殘碑

隋黃門侍郎柳旦墓志

隋尙書左僕射元壽碑

隋西林道場碑

後魏鎮東將軍劉乾碑

右後魏鎮東將軍劉乾碑云君諱乾字天白胡夷亂華典章文物埽地而盡至於名字書畫皆一出其私意而無復稽考可謂亂世矣若劉君者名乾字天豈不怪哉

結一廬朱氏贍餘叢書

後魏汝南王碑

右後魏汝南王碑王名悅孝文子也爾朱榮之亂奔梁梁武厚遇之立為魏主後復歸北據後魏書列傳云出帝時為大司馬卒而帝紀與北史皆言為出帝所殺蓋列傳之誤而此碑亦不書者諱也

北齊造像記

右北齊造像記云天保四年歲次己酉按齊文宣以東魏武定八年受禪改元天保是歲庚午至四年當為癸酉而此記誤書癸為己爾其字畫不工特以甲子差誤



三少冊  
金二十一  
恐後來疑焉因錄於此

北齊郁久閭業碑

右北齊郁久閭業碑郁久閭其姓本出東胡見於北朝者有後魏景穆恭皇后郁久閭氏云河東王毗之妹今魏書列傳但有閭毗又有閭大肥皆云蠕蠕人蓋同族也大肥道武時歸國尙華陰公主以此碑考之業乃大肥之孫魏書於皇后傳云姓郁久閭而於毗與大肥傳止言姓閭毗於景穆皇后爲兄弟其姓不應有異使後嘗更姓史家亦當具載兼大肥之孫亦不當復用舊姓

結一廬朱氏贖餘叢書

也蓋史之闕漏又碑云祖名大泥鵲起而史作大肥碑又云業茹茹國王步渾之玄孫蠕蠕或稱茹茹見於前史惟魏書蠕蠕列傳自木骨閭以來敘其世系甚詳無名步渾者亦莫知其爲何人也

後周延壽公碑頌

右後周延壽公碑頌云勳州刺史延壽郡開國公万紐于寔考之於史寔太師燕國公子謹子也謹後魏新安公于栗磾子洛拔之後余家藏有洛拔子烈碑述其世系甚詳云遠祖之在幽州世首部落陰山之北有山號



三  
五  
七  
五  
萬紐于者公之奕葉居其原趾遂以爲姓暨高祖孝文  
皇帝時始賜姓爲于氏焉今此碑復稱萬紐于者蓋後  
周時凡孝文賜姓者皆復改從舊云又姓纂及唐書宰  
相世系表皆云謹洛拔五世孫也以後魏及周書考之  
洛拔以太安四年卒年四十五謹以正光四年爲廣陽  
王元深長流參軍年三十一洛拔之卒距謹之爲參軍  
蓋六十四年矣洛拔旣早世不應後六十四年已有五  
世孫年三十一也以此知言謹爲洛拔五世孫者蓋未  
可信又周書稱謹祖名安定而唐書表作子安亦莫究

結一廬朱氏賡餘叢書

其孰失也

後周太學生拓拔府君墓志

右後周太學生拓拔府君墓志陳使周弘正撰云君諱  
吐度真魏昭成皇帝之後也夷虜以三字爲名者甚眾  
拓拔君爲書生尙仍舊俗何哉蓋自魏孝文帝惡夷虜  
姓氏盡易之至後周一切復改從舊故當時士人名字  
亦皆用虜語無足怪也

北齊華陽公主碑

右北齊華陽公主碑云公主諱秀豔蓋魏孝文帝之孫



廣平王懷之女北齊趙郡王叡之母也按北史叡列傳其前云母華山公主而其後乃作華陽今此碑及北齊書皆止言封華陽蓋北史誤

北齊天柱山銘

右北齊天柱山銘在今萊州膠水縣初後魏永平中鄭道昭爲郡守名此山爲天柱刻銘其上至北齊天統元年其子述祖繼守此邦復刻銘焉按後魏書道昭之父羲諡文靈而道昭所立義碑乃云諡爲文今此碑又云諡文貞皆莫可考

結一廬朱氏贍餘叢書

後周華嶽廟碑

右後周華嶽廟碑万紐于瑾撰趙文淵字德本書按後周書列傳有趙文深字德本蓋唐初史官避高祖諱故改淵爲深耳万紐于瑾者唐瑾也周文帝賜姓宇文氏後以于瑾請與同姓更爲万紐于云

後周河瀆碑

右河瀆碑後周天和二年建內史大夫琅邪王褒字子淵造文趙興郡守趙文淵字德本奉敕書余嘗讀楊大年談苑云千字文題敕員外散騎侍郎周興嗣次韻敕



字乃梁字傳寫誤爾當時帝王命令尙未稱敕至唐顯慶中始云不經鳳閣鸞臺不得稱敕敕之名始定於此按此碑及唐瑾撰華嶽廟碑皆文淵奉敕書後周距梁時未遠又隋薛道衡撰老子碑唐初虞世南撰孔子廟堂杜如晦碑歐陽詢書昭陵九成宮碑皆作奉敕如此類甚眾略舉一二要知不獨始於顯慶大年之論非也然則唐人所謂不經鳳閣鸞臺不謂之敕者蓋言命令當由廟堂出非謂敕之名始於此也然文淵奉敕書碑而自著其字何哉

結一廬朱氏贖餘叢書

後周同州刺史普六如忠墓志

右普六如忠墓志普六如者楊忠隋高祖父也後魏時賜姓以志考傳其事皆合惟其爲都督涇幽雲顯鹽靈等六州諸軍事而傳以幽爲幽者蓋傳寫誤耳

北齊隴東王感孝頌

右北齊隴東王感孝頌隴東王者胡長仁也武平中爲齊州刺史道經平陰有古冢詢訪耆舊以爲郭巨之墓遂命僚佐刻此頌焉墓在今平陰縣東北官道旁小山頂上隧道尙存惟墓在後而空其前與杜預所見邢山



上鄭大夫冢無異冢上有石室制作工巧其內鐫刻人物車馬似是後漢時人所爲余自青社如京師往還過之屢登其上按劉向孝子圖云郭巨河內溫人而酈道元注水經云平陰東北巫山之上石室世謂之孝子堂亦不指言何人之冢不知長仁何所據遂以爲巨墓乎

按頌有孝子堂之語故知卽水經所載也

### 後周溫州刺史烏丸僧修墓志

右後周烏丸僧修墓志僧修本姓王氏梁南城侯神念之子太尉僧辯之弟歸後周仕爲溫州刺史卒元和姓

結一廬朱氏贖餘叢書

纂及唐史宰相世系表皆言神念父罔爲護烏丸校尉因號烏丸王氏今墓志乃云僧修歸周賜姓烏丸又諸書皆云神念諡壯而墓志作莊唐表云僧修生景孝而墓志云名祥字景孝皆當以墓志爲正

### 北齊長樂王尉景碑

右北齊長樂王尉景碑按北齊書景字士真而碑云字副羽蓋傳之誤

### 北齊馮翊王平等寺碑

右北齊平等寺碑題太宰馮翊王定光像寶殿碑馮翊



王者名潤齊神武子也碑云寺魏廣平王懷所立永平  
中造定光銅像壹區高二丈八尺屬魏季像在寺外未  
果移入其後齊高祖過洛始遷像入寺至潤又增修殿  
宇焉據楊銜之洛陽伽藍記云孝昌三年十二月中此  
像面有悲容兩目垂淚三日而止其後爾朱榮北海王  
爾朱兆入洛陽像皆悲泣如初每經神驗朝野惶懼其  
事甚異而此碑不載

北齊臨淮王像碑

右北齊臨淮王像碑臨淮王者婁定遠也按北齊書和

結一廬朱氏賸餘叢書

士開傳定遠與趙郡王叡謀出土開爲兗州刺史未行  
士開納賂定遠得留復出定遠爲青州刺史責叡以不  
臣之罪而殺之定遠歸士開所遺加以餘珍賂之乃免  
如史所書定遠可謂小人矣定遠本傳但云封臨淮郡  
王而不書其爲青州者闕也又定遠從弟叡旣附見定  
遠傳而於外戚傳又重出南北朝諸史猥并類如此可  
笑也

北齊白長命碑

右北齊白長命碑云公字長命而其名已殘缺長命白



建之父也北齊書及北史建傳皆云父名長命者蓋齊魏間人多以字爲名耳

北齊大安樂寺碑

右北齊大安樂寺碑其額題廣業王大安樂寺碑廣業王者尉萇命之子破侯也碑云魏末離亂萇命嘗營護此寺其後破侯與其弟興敬復加營葺故立此碑按北史及北齊書有尉長命傳今碑乃作萇命又史云其卒諡曰武壯而碑乃作武莊當以碑爲正破侯嘗仕爲中書令尙書左僕射尙書令錄尙書事封廣業王官甚顯

結一廬朱氏臆餘叢書

而史無傳

北齊司空趙起碑

右北齊趙起碑按北齊書列傳云起天統二年除滄州刺史武平中卒於官今以碑考之起自滄州還闕除吏部尙書判外兵省事遷光祿大夫以本官兼尙書左僕射出行懷州事轉膠州刺史封南泉郡王乃卒史皆不書而云卒於滄州誤矣

北齊贈司空趙奉碑

右北齊趙奉碑奉彥深父也碑云諱奉字奉伯而北齊



書及北史但云名奉伯而已碑又云父清河府君剖符東秦著績齊土久於其職遂卽家焉今爲平原貝丘人也而史乃云彥深高祖父難爲清河太守遂家清河清河後改爲平原二事不同皆當以碑爲正惟史以謂彥深本名隱避齊廟諱故以字行而碑直書爲隱何哉

北齊宜陽國太妃傅氏碑

右北齊宜陽國太妃傅氏碑其額題齊故女侍中宜陽國貞穆太妃傅氏碑碑云太妃諱華清河貝丘人也按北史後魏置女侍中視二品然本後宮嬪御之職今以

結一廬朱氏贖餘叢書

宰相母爲之惟見於此傅氏趙彥深之母有賢操事載於史

北齊赫連子悅清德頌

右北齊赫連子悅清德頌據北史列傳子悅爲鄭州刺史郡人請爲立碑詔許之碑所載亦同而碑乃在今許昌者按隋書地理志潁川郡舊置潁州東魏改曰鄭州後周改曰許州又傳云子悅天保中爲揚州刺史而碑作陽州者按地理志東魏於宜陽置陽州後周改爲熊州云



隋興國寺碑陰

右隋興國寺碑陰丁道護書道護所書興國啟法兩寺碑皆在襄陽歐陽公嘗得啟法寺碑列於集古錄中而於太學官楊褒處見興國寺碑以不得入錄爲恨今碑陰又有襄州鎮副總管柳止戈以下十八人姓名字畫尤完好歐陽公所未見也蔡君謨題其後云在杭州日坐有客曰小說稱丁真永草永固知名丁何人也予謂道護豈其人耶按法書要錄丁覘與智永同時人善隸書世稱丁真永草永道護也

結一廬朱氏贍餘叢書

隋齊國太夫人楊氏墓志

右隋齊國太夫人楊氏墓志云夫人字季姜僕射高頴母也隋書頴傳云頴以母憂去職開皇二年伐陳詔頴節度諸軍據此頴之丁內艱蓋在開皇初今以墓志考之楊氏之卒乃在十年傳稱頴既貴其母嘗誠以遠禍後竟以危言爲煬帝所誅果如其言可謂賢母矣常恨不著其姓氏今乃見於此云

隋化善寺碑

右隋化善寺碑在徐州碑陰有郎餘令題記云隋尹式



撰余元祐閒侍親官彭門時爲兒童得此碑今三十餘年矣

隋願力寺舍利寶塔函銘

右隋願力寺舍利寶塔函銘仁壽三年相州刺史薛胄建唐劉禹錫集載僧靈澈詩有云經來白馬寺僧到赤烏年禹錫稱其工因讀此銘序亦以白馬之寺對赤烏之年乃知前入已有此語蓋隋唐閒文體大率以偶儷爲工雖格力卑弱然用事親切時有可喜也

隋周羅暎墓志

結一廬朱氏贍餘叢書

右隋周羅暎墓志無書人姓名而歐陽率更在大業中所書姚辨墓志元壽碑與此碑字體正同蓋率更書也往時書學博士米芾書善尤精於鑒裁亦以余言爲然羅暎名將隋史有傳今以墓志考之羅暎在陳自鍾離太守遷秦郡而史不載又史云開皇中自幽州刺史轉涇州母憂去職復起授幽州遼東之役徵爲水軍總管進爲上將軍而墓志自幽州爲水軍總管進上將軍然後爲涇州其遷拜次第皆不同又史云拜東宮右虞候率而墓志爲左監門率史云轉右衛率而墓志爲右監



門武侯率史云自右武侯大將軍進授上將軍而墓志不載蓋未嘗拜此官也皆當以墓志為據

史陵 隋禹廟殘碑

正書

右隋禹廟殘碑其文字磨滅十五六而其末隱隱可辨

云會稽郡

下缺一字

史陵書筆法精妙不減歐虞按張懷瓘

書斷云褚遂良嘗師史陵蓋當時名筆也今此碑摩滅而僅存世之藏書者皆未嘗有非余收錄之富則遂不復見於世矣

隋黃門侍郎柳旦墓志

結一廬朱氏贍餘叢書

右隋柳旦墓志以考隋史列傳其始終事迹皆同惟傳云攝判黃門侍郎而墓志云檢校黃門侍郎小異爾又墓志載旦六子變則綽楷濬亨而元和姓纂與唐史宰相世系表皆云旦五子而闕其第五子濬亦當以墓志為是也

隋尚書左僕射元壽碑

右隋元壽碑虞世基撰歐陽詢書按隋史壽開皇中為尚書主爵侍郎而碑云主爵郎碑云從晉王伐陳時兼揚州長史授行軍總管長史平陳遂為揚州總管府長



史遷尙書左丞而史但云自元帥府屬平陳入爲左丞  
爾又爲太常少卿時兼雍州司馬史亦不載其卒贈尙  
書左僕射光祿大夫封博平侯而史但云贈右僕射皆  
其闕誤史云壽在周封儀隴縣侯而碑作儀龍侯今按  
隋書地理志有儀隴縣屬巴西郡而無儀龍未知孰失  
也


隋西林道塲碑

右隋西林道塲碑題太常博士歐陽詢撰而不著書人  
名氏余家藏隋姚辨墓志元壽碑皆率更在大業中爲


結一廬朱氏贖餘叢書

博士時所書與此碑字體絕不類知其非率更書也

金石錄卷之二十二







結一廬朱氏贍餘叢書

金石錄卷之二十三

跋尾十三 唐 後周 隋

唐司空竇抗墓誌

後周黃羅刹碑

隋桂州總管侯莫陳穎墓誌

唐孔子廟堂碑

唐杜如晦碑

唐房彥謙碑

唐房彥謙碑陰

隋衛尉卿竇慶墓誌



唐大理卿郎穎碑

唐丹州刺史張崇碑

唐昭陵刻石文

唐昭陵六馬贊

隋益州長史裴鏡民碑

唐溫彥博碑

唐贈高穎禮部尚書詔

唐河間元王碑

唐弘濟寺碑

唐段志玄碑

唐獨孤使君碑

唐晉祠銘

唐相州刺史侯莫陳肅碑

唐孔穎達碑

唐太府卿李襲譽墓誌

後周大宗伯唐瑾碑

隋皇甫誕碑

唐司空竇抗墓誌

結一盧朱氏贍餘叢書



右唐竇抗墓誌歐陽詢撰并書其所歷官新舊史所書頗多闕略蓋抗在隋自岐州刺史遷冀州又遷定州又爲遼東道行軍總管改朔州道遂授持節幽易燕檀四州諸軍事幽州總管幽州刺史而史但云自岐州轉幽州總管其歸唐爲弘化道安撫大使遷光祿大夫又爲左武侯大將軍時以本官領同州刺史史皆不載其卒史言諡密而誌作容新史言贈司徒而誌作司空舊史亦爲司空與誌合

### 後周黃羅利碑

結一廬朱氏贖餘叢書

右後周黃羅利碑虞世南撰羅利仕周爲行軍總管其子君漢唐初爲將有功武德中爲父追立此碑按後魏元義本名夜义其弟利本名羅利元樹遺公卿書譏詆以謂夜义羅利皆鬼名也今羅利周人去魏不遠猶以爲名何哉

### 隋桂州總管侯莫陳穎墓誌

右隋侯莫陳穎墓誌穎隋書有傳以其事考之多合惟傳言穎諡曰定而誌不載按誌云公第四子尚書考功郎中乾會而傳作虔會乾虔義理皆通然予嘗得乾會



碑乃云名肅字乾會元和姓纂所載亦同疑其以字行爾蓋隋唐間人多如此

### 唐孔子廟堂碑

右唐孔子廟堂碑虞世南撰武德時建而題云相王旦書額者蓋舊碑無額武后時增之爾至文□□馮審爲祭酒請琢去周字而唐史遂以此碑爲武后時立者誤也睿宗所書舊額云大周孔子廟堂之碑今世藏書家得唐人所收舊本猶有存者云

### 唐杜如晦碑

右唐杜如晦碑虞世南撰驗其字畫蓋歐陽詢書也如晦唐偉人史家立傳不應草草今以碑考之頗多異同傳言如晦大業中嘗以選補滏陽縣尉棄官去而碑言在隋起家爲雍州從事及煬帝幸江都代王使君判留守事蓋如晦未嘗爲滏陽尉而亦未嘗棄官去也傳言秦王爲皇太子授左庶子而碑作右庶子傳言爲檢校侍中攝吏部尚書而碑作攝侍中吏部尚書傳云其祖名果而碑所書乃名徽傳云諡曰成而碑所書乃誠也蓋此碑乃太宗手詔世南勒文於石其官爵祖父名諱



不宜有誤皆可以正史氏之失矣

唐房彥謙碑

右唐房彥謙碑彥謙玄齡父也在隋任司隸刺史出爲涇陽縣令卒官不大顯而隋書立傳二千餘字者蓋修史時玄齡方爲宰相故也彥謙自曾祖而下三世皆封壯武侯隋唐史玄齡碑所書皆同獨此碑作莊武不知孰是碑李百藥撰歐陽詢八分書在今濟州章丘縣界中世頗罕傳

唐房彥謙碑陰

註一盧朱氏臆餘叢書

右唐房彥謙碑陰具載彥謙歸葬恩禮儀物之盛太宗遇玄齡可謂厚矣蓋厚其禮所以責其報也太宗可謂善任人矣

隋衛尉卿竇慶墓誌

右隋竇慶墓誌慶曾祖略祖善父榮定北史及北齊後周隋書皆有傳諸史皆云慶祖名善而慶之兄抗墓誌乃云名溫唐書宰相世系表以謂善一名溫今此誌名溫善皆不可考慶大業中仕爲衛尉卿史云爲羣賊所殺而墓誌云爲賊盧圓月所殺墓誌貞觀四年刻其小



楷工妙不減歐虞惜其不著名氏也

唐大理卿郎穎碑

右唐郎穎碑李百藥撰歐陽公集古錄云穎父名基字世業而百藥書穎世次但云父世業又書穎兄茂碑亦然考其碑文有皇基締構之言則基字當時公私無所諱避而百藥書穎父字而不名不詳其義是以君子貴乎博學余按隋及唐初人多以字為名故雖一時名公卿其名字混淆略不可考又按穎字楚之其事跡雜見北史隋書皆書為楚之而不載其名穎獨唐書郎餘令

結一廬朱氏賡餘叢書

傳云祖穎字楚之至於傳中敘述行事止稱楚之疑其亦以字行爾

唐丹州刺史張崇碑

右唐丹州刺史碑首尾已殘缺其可見者云公諱崇字平高按新唐書劉裴傳後載起義功臣事迹有張平高云綏州人從唐公平京城累授左領軍將軍蕭國公貞觀初為丹州刺史坐事以右光祿大夫還第卒今以碑考之其事皆同惟傳以字為名耳

唐昭陵刻石文



右唐昭陵刻石文太宗爲文德皇后立歐陽詢書其文具載於太宗實錄今石刻已磨滅故世頗罕傳其略可見者有云無金玉之寶玩用之物木馬寓人有形而已欲使盜賊息心存亡無異又云俯視漢家諸陵猶如蟻蛭皆被穿窬今營此陵制度卑狹用功省少望與天地相畢永無後患其言非不丁甯切至也然竟不免溫韜之禍太宗英武聰明過人甚遠而於此眷眷不忘何哉以此知死生之際能超然無累者賢哲之所難也又云國家府藏皆在目前與在陵內何異其詞尤陋得無爲

結一廬朱氏贖餘叢書

後世達士所笑乎

唐昭陵六馬贊

右唐昭陵六馬贊初太宗以文德皇后之葬自爲文刻石於昭陵又琢石象平生征伐所乘六馬爲贊刻之皆歐陽詢八分書世或以爲殷仲容書非是至諸降將名字乃仲容書耳今附於卷末云

隋益州長史裴鏡民碑

右隋裴鏡民碑殷令名書令名與其子仲容皆以能書擅名一時而令名遺迹存者惟此碑耳筆法精妙不減



歐虞惜不多見

唐溫彥博碑

右唐溫彥博碑歐陽公集古錄跋顏勤禮碑後云按唐書溫大雅字彥弘弟彥博字大臨弟大有字彥將兄弟義當一體而名大者字彥名彥者字大不應如此蓋唐世諸賢名字可疑者多封德彝云名倫房玄齡云名喬高士廉云名儉顏師古云名籀而皆以字行倫喬儉籀在唐無所諱不知何避而行字余按顏之推家訓云古者名終則諱之字乃可以爲孫氏江南至今不諱字也

結一廬朱氏廣餘叢書

河北士人全不辨之名亦呼爲字字固爲字尙書王元景兄弟皆號名人其父名雲字羅漢一皆諱之其餘不足怪也又顏師古匡謬正俗載或問人有稱字而不稱名者何也師古考諸典故以稱名爲是蓋當時風俗相尙如此初無義理也然師古既立論以稱名爲是而乃以字行殆不可曉也已

唐贈高頴禮部尙書詔

右唐贈高頴詔書貞觀十一年改葬有詔贈禮部尙書其事當載於史而隋書頴列傳唐書帝紀太宗實錄皆



不載

唐河間元王碑

右唐河間元王孝恭碑按新唐書孝恭自宗正卿歷涼州都督晉州刺史貞觀初為禮部尚書以卒今以碑考之自宗正遷禮部尚書坐事免尋復舊任俄授梁州都督改晉州刺史與司空無忌等同時冊拜觀州刺史世世承襲復授光祿大夫禮部尚書蓋孝恭凡三為尚書一免官一拜世襲刺史本傳皆不載而以梁州為涼者亦誤也又唐初功臣皆云圖形凌煙閣而此碑乃作戢

結一廬朱氏賡餘叢書

武閣戢武之名不見於他書惟當時石刻數數有之豈凌煙先名戢武而後改之耶

唐弘濟寺碑

右唐弘濟寺碑在今汾州據唐會要此碑李百藥撰唐太宗初即位下詔於建義以來交兵之處為義士凶徒隕身戎陣者各建寺刹分命儒臣為銘凡七碑余所得汜水等慈呂州普濟幽州昭仁與此碑凡四而虞世南褚遂良所撰今皆亡矣

唐段志玄碑



右唐段志玄碑以唐史考之多不合碑云公諱某字志玄而其名已殘缺然史初不載其名也碑云鄒平人而史云臨淄人碑云諡忠壯而史云諡忠肅舊史亦作忠壯與碑合又碑云圖形戢武閣按唐史及諸書功臣圖形皆云凌煙閣初余得河閒元王碑云圖形戢武意謂凌煙先名戢武後改之爾今得斯碑亦同由是益知前言之不謬二碑皆當時所立不應差誤也

唐獨孤使君碑

右唐獨孤使君碑云君諱某字延壽而其名殘缺不可

結一廬朱氏贖餘叢書

辯延壽隋子也隋書外戚傳云隋二子延福延壽元和姓纂亦云隋生延壽皆不著其名又姓纂云延壽封新蔡公而碑云封新蔡縣開國男亦當以碑爲正

唐晉祠銘

右唐晉祠銘太宗撰并書晉祠者唐叔虞祠也高祖初起兵禱於叔虞祠至貞觀二十年太宗爲立碑焉

唐相州刺史侯莫陳肅碑

右唐侯莫陳肅碑肅隋桂州總管穎之子也元和姓纂所載侯莫陳氏云其先後魏別部居庫斛真水周書云



代武川人世爲渠帥隨魏南遷爲侯莫陳氏子嘗得穎  
及穎之孫涉墓誌皆云本劉姓系出漢楚元王交穎墓  
誌則以爲父崇後周時賜姓涉墓誌則以爲崇王父豐  
後魏時賜姓二說已自不同而肅碑乃云漢中山靖王  
勝之後勝曾孫劭謀誅王莽不密避難於代因左言而  
命氏改姓侯莫陳焉自古史傳所載容有異同今穎肅  
涉三世歲月相接而碑誌所書自相乖戾如此皆莫知  
其孰是豈其姓氏本出夷虜而唐初以族望相高故妄  
言出於名胄以欺眩世俗初無所稽據乎不然殆不可

結一廬宋氏贍餘叢書

考也已

### 唐孔穎達碑

右唐孔穎達碑于志甫撰世傳虞永興書據碑云穎達  
卒於貞觀二十一年時世南之亡久矣然驗其筆畫蓋  
當時善書者規摹世南而爲者也

### 唐太府卿李襲譽墓誌

右唐李襲譽墓誌唐史列傳載襲譽官闕甚略據墓誌  
云武德初拜太僕卿出爲潞州總管尋徵拜太府卿而  
傳言高祖定長安授太府少卿者蓋傳誤傳言襲譽坐



私憾杖殺番禾丞劉武嘗廢爲民流泉州卒而墓誌不載疑諱之也

後周大宗伯唐瑾碑

右周唐瑾碑以後周書及北史列傳校之首尾皆抵牾不合傳云字附璘而碑云字子玉傳云始仕爲尚書員外郎而碑云釋褐員外散騎侍郎傳云初封姑臧縣子而碑云永昌子傳云爲吏部尚書以父憂去職尋起令視事而碑云爲周太祖記室其年丁武公憂起復太子舍人傳云爲驃騎大將軍開府儀同三司進爵臨淄伯

結一廬朱氏賡餘叢書

轉吏部尚書于謹伐江陵以爲元帥府長史而據碑爲吏部尚書皆在爲驃騎開府及元帥長史已前又其改封臨淄伯蓋爲龍驤將軍時而其爲開府乃進爵爲公傳云六官建授禮部中大夫而碑云授宗伯傳云出爲蔡州刺史歷柘州硤州轉荊州總管府長史入爲吏部中大夫歷御正納言中大夫久之除司宗中大夫兼內史卒於位而碑云先爲拓州刺史乃遷蔡州授司宗御正納言又轉荊州總管尋遷小宗伯乃薨其遷拜次第不同如此傳云瑾嘗爲戶部尚書硤州刺史吏部中大



夫今據碑皆未嘗拜而柘州碑作拓碑云瑾嘗爲黃門侍郎又爲散騎常侍尋領大著作修國史及起居注又爲侍中傳皆不載其卒也傳云贈小宗伯而碑云贈華州刺史傳云諡曰方而碑云諡曰懿碑于志甯撰貞觀中其孫皎所立後周書北史皆唐初修距瑾之卒歲月未遠而顛倒錯謬如此然其官爵名字子孫不應有誤皆當以碑爲據也

隋皇甫誕碑

右隋皇甫誕碑余嘗得誕墓誌又得此碑以考北史及

紆一屋外氏贖餘董

隋書列傳傳云誕字玄慮而碑誌皆作玄憲傳云隋高祖受禪爲兵部侍郎數年出爲魯州長史開皇中復爲比部刑部二曹侍郎遷治書侍御史爲河南道大使及還奏事稱旨令判大理少卿明年遷尙書右丞以碑誌參考誕自司徒主簿出授長史俄除益州總管府司法徵授比部侍郎蓋未嘗拜兵部而其爲河北河南安撫大使乃任右丞時皆史家之謬惟墓誌稱誕嘗爲司徒主簿而碑不載傳與墓誌皆云爲魯州長史而碑作廣州則疑碑之脫漏墓誌乃葬時所述然碑亦貞觀中其



子無逸追建不應差謬而不同何也

金石錄卷之二十三

唐益州學館廟堂記  
唐萬年宮碑陰題名  
唐薛收碑  
唐崔敦禮碑  
唐贈左僕射楊達碑  
唐李靖碑  
唐辨法師碑  
唐蘭陵長公主碑

結一廬朱氏賡餘叢書

金石錄卷之二十四

跋尾十四

唐益州學館廟堂記

唐萬年宮碑陰題名

唐薛收碑

唐崔敦禮碑

唐贈左僕射楊達碑

唐李靖碑

唐辨法師碑

唐蘭陵長公主碑



唐清河公主碑

唐趙弘智碑

唐登封紀號文

唐司元太常伯竇德玄碑

唐于志甯碑

唐弘文館學士顧君墓誌

唐碧落碑

唐興昔亡單于阿史那彌射碑

唐阿史那忠碑

結一廬宋氏贍餘叢書

唐明徵君碑

唐黎尊師碑

唐李勣碑

唐陽翟侯夫人陸氏墓誌

唐少姨廟碑

唐啟母廟碑

唐房玄齡碑

唐高士廉瑩兆記

唐益州學館廟堂記



右唐益州學館廟堂記成都縣令顏有意書撰人題法  
曹陳王文學太子詹事待詔弘文館陵州長史而姓名  
殘缺不可辨集古錄直以爲有意撰非也碑陰載當時  
官僚姓名後人題云此記賀遂亮撰未知果是否記文  
敘述前世遺跡考究同異文辭古雅甚可喜也

唐萬年宮碑陰題名

右唐萬年宮碑陰者高宗自爲萬年宮碑詔宰相而下  
皆題名於其陰余每覽此碑見長孫無忌褚遂良許敬  
宗李義府同時列名未嘗不掩卷太息以爲善惡如水

結一廬朱氏賸餘叢書

火決不可同器惟人主能辨小人而遠之然後君子道  
長而天下治若兼收並用則小人必得志小人得志則  
君子必被其禍如無忌遂良是已然知人帝堯所難非  
所以責高宗也

唐薛收碑

右唐薛收碑文字殘缺其可讀處以唐史校之無甚異  
同惟收之卒諡曰懿而史不書爾又收之子元超據唐  
史及此碑皆云名元超而楊炯盈川集載炯所爲元超  
行狀乃云名振字元超蓋唐初人多以字爲名耳



唐崔敦禮碑

右唐崔敦禮碑按新唐史列傳云敦禮字安上而宰相世系表則云名安上字敦禮今此碑所言與表合然舊史及碑皆言敦禮本名元禮高祖爲改名焉其孫兢墓誌亦云名敦禮蓋疑其以字行耳又世系表其末載崔氏爲宰相者二十餘人而獨不著敦禮乃其闕漏也

唐贈左僕射楊達碑

右唐贈左僕射楊達碑達觀王雄弟也煬帝時官至納言卒贈吏部尚書唐顯慶中以武后外祖父加贈左僕

結一廬朱氏賸餘叢書

射官爲之立碑以隋書列傳攷之時有異同傳云字士達而碑云字叔莊傳云年六十二而碑云年六十五皆當以碑爲正又傳云諡恭而碑云諡懿予集錄有李嶠所撰武后母墓碑亦云諡爲恭與傳合未知孰是也

唐李靖碑

右唐李靖碑集古錄云靖之封衛國公也授濮州刺史蓋太宗以功臣爲世襲刺史後雖不行史宜書而不書者闕也余按新史長孫無忌傳載無忌以下授世襲刺史者凡十四人姓名俱存蓋其事已見於他傳則於本



傳似不必重載也

唐辨法師碑

右唐辨法師碑薛純陁書歐陽公集古錄云純陁太宗時人其書有筆法意其當時必爲知名士而今世人罕知者然亦不傳於世集古所得純陁書祇此而已余按法書要錄云薛純陁學歐草微傷肥鈍亦通之亞也然則純陁當時真知名矣余又得純陁八分書比干碑歐陽公所未嘗見也與純陁同時有薛純唐太宗命書砥柱銘者其筆法與純陁絕相類疑卽一人蓋唐初時人

結一廬朱氏贖餘叢書

姓名多如此耳

唐蘭陵長公主碑

右唐蘭陵長公主碑李義府撰據唐書列傳公主太宗第十二女而碑云第十九女蓋傳誤也

唐清河公主碑

右唐清河公主碑公主太宗女也碑云下嫁程知節之子處亮知節碑文及唐史知節列傳元和姓纂所載皆同惟公主列傳作懷亮非是唐家一史而首尾自相乖戾者甚眾非特此也



唐趙弘智碑

右唐趙弘智碑云弘智字處仁而史不載又云自太子舍人爲吏部員外郎遷國子博士檢校吏部郎中尋爲越王府長史兼檢校吏部侍郎遂轉黃門侍郎舊史亦云累遷而新史直云由太子舍人拜黃門侍郎爾又弘智爲國子祭酒嘗領東宮賓客而新舊史亦皆不載

唐登封紀號文

右唐登封紀號文凡兩碑皆高宗自撰并書其一大字磨崖刻於山頂其一字差小立於山下然世頗罕傳政

結一廬朱氏贖餘叢書

和初余親至泰山得此二碑入錄焉

唐司元太常伯竇德玄碑

右唐竇德玄碑以唐史本傳考之其事多合惟德玄爲御史大夫攝吏部禮部度支三尚書遂遷大司憲史皆不載又其弟德遠史云封樂安男而碑作樂平皆當以碑爲正

唐于志甯碑

右唐于志甯碑以考唐史列傳其微時所歷官史多不書今亦不復錄錄其尤著者碑云大業十年爲清河縣



長而傳云爲冠氏長碑云自中書侍郎遷兵部授蒲州  
刺史不赴後爲衛尉卿判太常卿事以本官兼雍州別  
駕遷禮部尙書而史皆不載史云自侍中拜尙書左僕  
射同中書門下三品頃之兼太子少師遷太傅顯慶四  
年以老乞骸骨詔解僕射更拜太子太師仍同三品今  
以碑考之其初拜僕射也未嘗領中書門下三品至罷  
僕射乃爲同中書門下參謀朝政皆史官之誤又按百  
官志唐初宰相有參議朝政參預朝政參知政事其後  
有同中書門下三品同平章事永淳中遂以平章事入

結一廬朱氏贖餘叢書

銜而獨無參謀朝政之名蓋惟見於此耳

唐弘文館學士顧君墓誌

右唐顧君墓誌已殘缺亡其前一段以事考之蓋顧君  
也脩高宗朝爲弘文館學士司文郎中卒姓名附見唐  
書令狐德棻傳其子琮仕武后爲宰相今此誌但云第  
六子琮等而無琮豈當時官未顯故不載歟

唐碧落碑

右唐碧落碑大篆書其詞則唐宗室黃公譔所述或云  
陳遺玉書或云譔自書皆莫可知李肇及李漢並言李



陽冰見此碑徘徊數日不去又言陽冰自恨其不如以  
槌擊之今缺處是也此說恐不然陽冰嘗自述其書以  
謂斯翁之後直至小生於他人書蓋未嘗有所推許唐  
人以大篆當時罕見故妄有稱說耳其實筆法不及陽  
冰遠甚也

唐興昔亡單于阿史那彌射碑

右唐阿史那彌射碑彌射本西突厥嘗歸朝後伐龜茲  
爲蘇海政所殺舊唐史紀彌射事甚詳多與碑合而新  
史所書甚略如高宗朝冊爲崑陵都護興昔亡單于皆

結一廬朱氏贍餘叢書

不載碑云單于諱某字彌射而缺其名不書史但言名  
彌射豈非作碑者爲緣飾之乎

唐阿史那忠碑

右唐阿史那忠碑唐書列傳云忠尙宗室女定襄縣主  
始詔姓獨著史今此碑當時所立題云阿史那府君之  
碑而元和姓纂亦云阿史那氏開元中改爲史疑傳誤  
也唐太宗親撥隋亂卽位未幾遂致太平其好賢樂善  
蓋出天性故一代豪傑樂爲之用如忠之徒乃出於降  
虜亦皆立勳本朝著名後代雖云太宗天姿英睿絕人



甚遠至於輸忠盡節眾賢之助亦多矣於乎盛哉

右唐明徵君碑

右唐明徵君碑徵君者梁明山賓也高宗朝其裔孫崇儼以方技進故立此碑舊唐史言高宗自製文而書之非也蓋高宗撰文高正臣書耳

右唐黎尊師碑

右唐黎尊師碑題曰盧子昇字照鄰撰按唐史盧照鄰字昇之與此碑不合蓋唐初人多以字為名爾至以子昇為昇之則疑史之誤

結一盧宋氏勝餘叢書

唐李勣碑

右唐李勣碑按唐史太宗屬疾出勣為疊州都督高宗立召授檢校洛州刺史今以碑考之其除洛州乃在太宗朝高宗即位授開府儀同三司爾又新舊史皆云勣年八十六而碑云年七十大碑高宗自撰其所書官爵年壽皆可信不疑也

唐陽翟侯夫人陸氏墓誌

右唐陽翟侯夫人陸氏墓誌陽翟侯者褚遂賢也元和姓纂及唐書宰相世系表載遂賢一子兼藝為永州司



功今此誌云二子兼善兼愛而無兼藝兼善兼愛二子  
姓纂唐史漏落容有之惟兼藝墓誌不書者何也豈非  
唐表誤乎

唐少姨廟碑

右唐少姨廟碑楊炯撰云少姨廟者則漢書地里志嵩  
高少室之廟也其神爲婦人像者則故老相傳云啟母  
塗山氏之妹也余按淮南子云塗山氏化爲石而生啟  
其事不經固已難信今又以少姨爲塗山氏之妹廟而  
祀之其爲淺陋尤甚蓋俚俗所立淫祀也炯旣載之於  
碑又遂以爲漢書所謂少室之廟者何其陋哉

唐啟母廟碑

右唐啟母廟碑崔融撰按淮南子云禹治鴻水通輶轅  
山化爲熊塗山氏見之慙而去至嵩高山下化爲石方  
生啟禹曰歸我子石破北方而啟生其說可謂怪矣然  
漢武帝幸緱氏至中嶽見夏后啟母石列於詔書則固  
已信之矣其後郭璞注山海經顏師古注漢書皆具載  
其語而融又文其事於碑流俗安得不惑乎自古荒誕  
之士喜爲奇辭怪說以欺世眩俗學士大夫能卓然不



惑者蓋鮮如啟母化爲石伊尹之母化爲桑事尤不經  
難信然由古迄今未有非之者也於乎此君子所以惡  
攻乎異端也歟  
右唐房玄齡碑文字磨滅斷續不可考究惟其名字僅  
存其後題修國史河南公而姓名殘缺者褚遂良也按  
舊唐史云玄齡名喬字玄齡而新史乃云名玄齡字喬  
今碑所書與新史合惟宰相世系表又云玄齡字喬松  
者不知何所據也

唐高士廉塋兆記

右唐高士廉塋兆記唐史及元和姓纂皆云士廉父名  
勵而北史作勸今此碑與北史合蓋唐史及姓纂傳寫  
誤耳碑許敬宗撰趙模書模字畫甚工蓋貞觀中太宗  
命臨蘭亭敘者

金石錄卷之二十四







